

حواديت عينا موتوسا

مراد ماہر

حواديت عينا موتوسا

مراد ماهر



إلى أبي وأمي وإخوتي وأبنائهم...

أحبكم وأعشق النظر إليكم من بعيد

"من فوق أرضي"

إلى غريبت ..

استطاعت اختصار النهايات واختزال كل النساء

في جذوة من قبضت أجمال.

... دعينا نستقطب معطيات الفرحة

نتناسى أجنون لنزداد جنونا

ونستدعي الاختلاف لنحيا لا شبيه لنا.

إلى روحها ...

تلك التي قيدت المرضى

وأهدته أسيراً إلى قلمها .

" نعمات البحيري "

إِوعَى تَنَام ...

سَاعَات بِيكُون النّوْم أُنْخَر مَسْمَار فِي دَعَاغ الحَدَوْتَة .

والحدوتة دعاغها صغير ...

قد العمر

المقدمة

في كل مكان، وفي كل أوان؛ الناس محتاجة للحواديت، مش عارف
ليه، يمكن علشان يهربوا من حكايات تانية، يمكن علشان يجروا
ويّا شخوص الحدوتة في لعبة زي القطة العامية، ويمكن علشان
في الآخر يخرجوا لسانتهم للحدوتة، ويقولوا بعلو الصوت مع
ضحكة خليعة شوية:

"مش إحنا، معرفتيش تطولينا".

والله ما انا عارف يا اخوانا مين لاحظتها راح ببيكون ضاحك على
مين.

جدي قبل ما يصبح حدوتة من ضمن الحواديت اللي في بيتنا،
واللي بتتخزن في الغالب جوه شفايف أمي، كان بيقوللي:
"ما تيجي يا واد يا صغير تحكي لي حدوتة، شكلك عفريت".

وأرد عليه باستغراب مدروس وأقول له:

"أنااا يا جدي، أحكيك حواديت؟ ده أنا لسه صغير باهرب من سيرة
العفاريت، استنى أناديك أمي".

ويوقفني بطرف صباعه العيان ويقوللي:

بيني وبينكم قلت وماله نسمع برضه رأي الخبرا في الموضوع.
أمي تقول من غير ما تبص لخلقة أهلي:
"يا بني الحواديت هيا الدنيا، والناس اتولدوا لِقوا نفسهم بيحبوها،
ورغم العشق ده كله ما بين الناس والدنيا دايمًا عايزين ينسوها.
أصل الدنيا منها علاجها وفيها دواها، حتى لما بنلن أيامها ونقول
احنا بنكرها، بنلاقي حكاية أو اتنين تفاصيلها تجن، فيها كتير من
ملاحنا وفيها كتير من كل المخزون من همّ".

تقريبًا أمي نسيت تقشير التوم، تقريبًا نسيت تحرق غدا أبويا.
سحبت ايدي على أوضة جدي المقفولة، وعطنتي كتاب مكتوب
على بابيه "دنيا الحواديت"، وقالتلي:
"واحنا صغار قاللنا جدك إن العنوان مكتوب بالشقلوب، يعني
الكلمة الأولى مكان الثانية يا حبوب".
قلت:

"وماله يا أمي مش فارقه كتير".

ضحكت أمي وقالت:

"أغبي من أبوه بكتييبيير".

الشاهد...

خدت كتاب جدي وجريت لبعيد، حالف بمقام سيدنا أبو عزام لافهم
كل المكتوب وأفض بكاره كل جديد.

حواديت جدي كانت زي الغنيوة اللي بنسمعها في ليلة المولد،
بيغنيها كبار لابسين زي شيوخ الجامع، عمّة وجبة وكمان ققطان.
والناس تصرخ من حوالهم الله.. الله.. عيد.. فنان والنبي فنان.

ليلة المولد في بلدنا دايمًا كانت ليله صُبُحها جمعة، والناس تستنى
الليلة يمكن أكثر م العيد.

أمي بتدبح وزه سمينه تبدأ تظغيطها قبلها بشهر، واللّمة الحلوة
حوالين الوزه بتخللي ستي تقول في ودانا؛ والوزه بتقطع"
"شي الله يا بخوري".

راح يتريق واحد من حضراتكم ويقوللي: "بخوري؟".
هسسسس.. إوعاك تنطقها، أحسن تصحى تلاقى عنيك في أفاك،
كل ما تتقدم ثانية ترجع دقيقتين لوراك.

أصل "بخوري"؛ أقصد سيدنا بخوري؛ لما بيغضب على واحد م
الجُهل بيعيش اللي بيتبقى في عمره محتاس عمّال على بطل..
على فكرة ده كلام ستي فهيمه.

ست الستات كنتي والله يا ستي، فهمانة ف كل صغيرة وكبيرة،
مش عارف ليه كان بيخاف منها الرجاله، حتى المأمور والعمدة
كانوا ببيجوا في الأعياد ويودوها.
وأنا مالي.

نرجع بأه تاتي لجدي الـ كان مشغول بكتاب الحواديت، وسايب ستي تبقى كبيرة العيلة.

جدي كان بيحب الست نعيمة فراشة الوحدة الصحية، صحيح إنها وقت الزنقات بتكون دكتورة، بس الناس في الأول والآخر كارهين مياعتها ومياصتها، لدرجة إنها كانت ممنوعة تخطي عتبة دارنا. ستي كانت بتقول: " عتبتنا الطاهرة متعتبهاش بنت الـ.....".

أمي كانت بتقول على ستي إنها مرا قادرة وجامدة وبميت راجل، علشان كده قررت في يوم؛ مش فاكتر ترتيبه في وسط الشخابيط اللي في عمري؛ إني أحول ستي لست وتحكيلى حدوتة. بس إزاي؟

دي بتكره كل الحواديت واللي بيحكوا الحواديت، وبتكره كل ولاد أولادها عشان بيحبوا التوتة توتة... طب أفولكوا سر على النوتة؟ كانت بتزقق لأمي لو لقيتها ماسكه كتاب، وبتفرح موت لو لقيتها بتطبخ أو ماسكة الفوطة.

طب شوفتوا الكارثة؟..

سطح البيت كان فيه عنباية، جدي حط في وسط التكهيبية كرسي قديم من نوع طلسيم، رجل الكرسي القدامانية كانت أقصر سنة من اللي وراها... ستي في يوم طلعت فوق، عرفت بالكارثة، وكان

الحل يليق بالحادثة، حطت حطة ونص من كتب الحوادث تحت
الرجل الزعلانة م الأرض، صالحتهم على بعض.
يومها جدي لطم على خده زي النسوان، وقعد يصرخ ويفر فر زي
العيان.

يا عيني يا جدي، كان لما يشوفها يقول:
"الست فهيمة دي أكثر واحدة بتفهم في الدنيا".
الله يرحمه.. عاش في عذاب، ومات كداب.

أسف جداً..

نرجع تاني لمرجوعنا، الحيلة اللي عملتها على ستي عشان
تحكي لي الحوادث..

أكثر حاجة كانت بتأثر فيها سيرة الناس الصالحين، ستي كانت
بتصلي الخمسة، وتصوم اتنين وخميس، وف فجر الجمعة تقعد
وسط الأموات تستقبل نور الدنيا بقراءة الفاتحة وياسين.

على فكرة أحياناً كانت تحفظ قرآن وساعات ترفع صوتها وهي
بتقرأ، يسمعها اللي في آخر الشارع.

كانت بركة.

والبت "جرادة" الشغالة كانت زنانة وحرّكة، ودايمًا كانت لما تحب
تنرفز أُمي تقول:

"ستي فهيمة دي بركة".

تقدر أمي ترد عليها؟ أو تشخط فيها؟ أو تضربها؟
فوراً حتقوم الحرب العظمى ما بينها وبين ستي فهيمة، والحرب ما
بينهم شبه الحرب ما بين بريطانيا العظمى وحي بولاق، لا الأولى
بتقدر تمحيها، ولا أمي بتقدر تمحي الكره اللي بيملا عنيا.
والبت جرادة بتفرح بالحرب الباردة ما بينهم، وبينها وبين نفسها
بتضحك وتقول: "أرزااق".

وأنا برجع أدور حوالين ستي، مره أبوسها، ومره ألاعب ايدي
الهبلة في شوارع بين صوابعا، وبنادي عليها:
- ستي يا ستي..

وترد علياً: "قول يا روح أمك"

- سيدي الجارح جاتي في منامي امبارح.

- "وحيااة أمك".

ف جريت.

حبة تفوت وشوية يعدوا...

ستي فهيمة هديت وناديت لي، وقالت:

"شكلك كده كداب مش نافع، شكلك شارب حُبّ الحواديت من

سيدك، شكلك شبه أمك متسهوك ومنسون وملوع".

يا نهار كحلي، ستي فهيمة بتكرهني، عرفت إني موالى لحزب

الحواديت المايح.

يا نهار موحول، الخطة اللي قعدت ليالي بخطط فيها وأكلها وأغديها
طلعت مقفوسة؟ سهوكتي اللي بتحبي ناحية ستي طلعت مهروشة؟
الله يجازيكي يا دماغي، راح تعملي إيه؟
طبعا عارفة، مش حعرف أعيش في الدار بعد ما ستي هرشت
نصبايتي عليها..

مش حعرف أضحك تاني ولا ألعب تاني في نواحيها..
مش حعرف أغني غنيوة كنت باصحي بيها الدار في الفجرية..
ولا ألعب بالكورة في حوش الدار في الضهرية..
ولا أقعد من بعد العصر قدام حلة أمي أممص في العضم.
وأكيد مش حقدر أمدد تاني في العنباية بتاعة سيدي أسمع حواديته
وقت الليل ما يموت نور الشمس..
ولا حقدر أتأوب على حجر أمي، وأبويا فرحان بيا وبيبوسني وقت
الليل ما يكون لابس ضلمة، وعامل زعلان عالشمس..
وأكيد مش ححضر تاني مولد سيدنا بخوري..
وأكيد مش حشخط تاني في البت جرادة.
آآآآ، بنت الكلب الجربانة، راح تشمت فيا وتجري ورايا ف وسط
الدار وتقول:

"ما توسخش الأرض، أنا ماسحة".
إلهي يولع شعرك يا بعيدة يا ماسخة.
راح تعملي إيه يا دماغي .. راح تعملي إيه يا دماغي.

آه، أعمل عيان .
والله فكرة، أعمل عيان ..
وقفشت في بطني وصرخت بعلو الصوت؛ زي ما بواب متعافي
يقفش في حرامي هربان .
آه يا بطني.. آه يا بطني..
اتلمت حواليا الدار، أمي بتصرخ م الرعب عليًا، وجدي أول حاجة
نطق بيها: " ننده للست نعيمة ".
وأرد عليه في دماغي:
" وده وقته يا جدي؟"
إيد ستي فهيمة ظهرت فجأة ورا عمة جدي، وطااااخ...
" ست نعيمة يا كرماني؟.. خليتها الست؟.. وبتعصى أوامري
وتحلم إنها ممكن تدخل داري؟! ".
ما قدرتش أمسك نفسي، ونسيت بطني وأمي وجدي وستي، وقعدت
آأضحك، آأضحك .
ودي كانت آخر مرة أضحك فيها من غير ما أتألم .
كل ما آجي أقعد واعمل حمام بتفكرني اللسعة اللي ورايا بستي
فهيمة وهي بتلعب بالنار في " اللامؤاخذة ".
... سامحوني مقدرتش أنسى .
على فكرة، أنا بعد ما خلصت الجامعة، خطيت ورقة فيها بلاغ عن
ستي فهيمة لكل الجمعيات الأهلية .

من يومها حلفت ما حسمع ولا حطلب حدوتة من حد.

آه...

حكتب كل الحواديت اللي بشوفها واللي حشوفها..

حكتب عن دارنا، عن ظلم الست فهيمة لسيدي كرماني..

عن طيبة أمي الشقيانة طول اليوم في الحلة الـ"قعرها" محروق..

عن جدي الهيمان في الست نعيمة المايصة..

عن أبويا؛ اللي لحد السطر المكتوب مش متخيل حدوتة على

مقاسه..

حكتب عن كل الناس المبروكة، عن مقاماتهم، عن موالدهم، عن

كرامات عمري ما حسيتها غير في عيون ستي والبت جرادة.

حكتب عن أمي اللي تصوّت لما أخوها يموت، وتصوّت برضه لما

يموتها دكر البطا!.

حكتب عن جهل الناس في بلدنا بالفرق ما بين الدين والعيب.. ما

بين الدقة اللي في قلب الخايف، والرعشة اللي في عين المظلوم..

ما بين الفاس العرقان بدموع الأرض، والفقير اللي بينحر في

عيدان الجلايب.

حكتب عن غفرا بلدنا الواقفين قدام النقطة ببندق شبه النبائيت،

شنباتهم أقواس ودواير حاجزة وراها الخوف من عقل النبي آدم

لما ينور.

حكتب عن أصغر تفاصيل في عقولهم، اللي بيحلفوا في اليوم ميت
مرة إنها أكبر بكثير من كل الدنيا.

حكتب عن أفرح نوع عرفوه من أنواع الفرحة، لما ببيجي الواد
على ست بنات.. عن أحزن نوع عنديهم من أنواع الحزن، لما
تموت الأم وهي بتولد بت ولسه ما جابتش الواد.
الأغرب إن الدمعه في الحالتين بتكون الحل المعتاد.

حكتب عني وعن نور الصبح اللي وانا صغير كنت بقول:
" هانت، كلها كام حلم وحصى ألقية قدامي ينورلي اللي اتبقى في
عمري".

م الآخر قررت أغيط ستي فهيمة وأكتب حواديت.

حكتب حواديت

إِوعَى تَنَام ...

لِحَسَنِ تَصْحَى تَلَا فِى عِنِكَ عِيَانَهُ ..

فَمَتَّعَرَفْتَنى تَعِيطُ

الحدوتة الأولانية

المنظر من بلكونة دارنا يجنن يا اخوانا.
وقبل ما نسرّح في الحدوتة، واجب إني أنبه حضراتكم " ما تعدوش
كلمة بلكونة بالساهل".

آخر حاجه كان يفهمها الناس في بلدنا يشوفوا بني آدم واقف فوق
سطح الدار، بيخزن حبة غلة أو بيوزع بالعدل أقراص الجلة على
نور الشمس.. وآخر حاجة كان بيقولها أهل بلدنا عن البلكونة :
" أوضة مفتوحة بنلمحها فوق قصر محمد بيه الراجح متعلقة من
غير مسمار".

على فكرة، محمد بيه الراجح يرجع أصله لسيدنا الراجح، وسمعت
كلام إن البلكونة كرامة من وسط الكرامات اللي ورثها وخلته جبار،
أغنى واحد على مرمى نظرهم، والنايب عنهم بعد ما كان أحقر من
أصغر صرصار.

سبحان الوهاب العاطي.

الشاهد...

المنظر من بلكونة دارنا يجنن يا اخوانا، عامل زي اللوحة اللي بيرسمها عيال؛، ربنا يلطف بينا وبيكم؛ عنديهم حاجة عبيطة في دماغتهم، ممكن يرسمك ساقية جنب البحر المالح، ممكن يرسمك شمس شعاعها أوطى من كعب الكتكوت، ممكن يرسمك مصنع أكل مكنه بيدور بقوالح.

المنظر بيدأ بالشجرة اللي على شمال الدار، الناس بتقول إن الراجح هو اللي زرعا وهو صغير، ونحت على جذع الشجرة كلمة: "سبحان الله".

الرياح والجاي يتمسح فيها لجل البركة تحل عليه.

قدام الشجرة تل زباله بيعلا عن الأرض مقدار طول عشرين عيل واقفين فوق بعض.

وف وسط التل ممر نضيف وطويل في نهايته سور عيان بيحوط على سيدنا الراجح، وجنب السور م الناحية التانية خرابة كبيرة لماتشات الكورة.

وف آخر المنظر من فوق بتشوف المادنة العالية بتاعة الجامع، بيقولوا ده أكبر جامع في الدنيا، وكمان الناس لما بترجع م الحج بتقول إن الجامع ليه أخ هناك.

أكثر حدوتة غريبة عن الجامع موضوع الكنز، اللي الأرض الـ
"حواليه" تنشق عليه مرات معدودة ف عمر الدنيا، واللي يصادف
ويعدي من جنب الجامع لحظتها راح يبقى قارون.

طول عمري وأنا صغير كنت بحب أقعد باصص ع اللوحة اللي
رسمها عيل مجنون.. مش علشان أتفرج ع الناس اللي بيتباركوا
بشجرة دارنا، ولا علشان النسوان اللي ببيجوا مع الفجر لسيدنا
الراجح يطلبوا منه الخلفة أو طولة العمر لعيل بيموت، ولا علشان
الكورة اللي بتهرب لأقرب لمبة جاز وتكسرهما، ولا علشان ألمح
كنز بيخرج من تحت الجامع.

كنت بحب المنظر علشان أتفرج بعد أدان المغرب على عيل أكبر
مني بشبرين، بلاقيه يخرج من خط ييفصل بين النور والضلمة من
جوه التل.

وأسأل أمي وأسأل ستي، والبت "جرادة" ترد عليًا :
"عيل ملهوش أهل".

وقالتلي كمان إنه حرامي.. طب ليه يا جرادة...

ترد تقول :

"معرفش... شكله كده مش سهل".

مش عارف مين سماه فارس، بس لاقيتني بقول له في سري يا
فارس، ومحدث في بلدنا كان يعرف فارس قدي، ومحدث كان

يعرف مواعيده لما يخرج من وسط زبالته قبل المغرب، ولا لما
يبرجع ليها قرب الفجر.

كان يلمحي في البلونة ويضحك، مش بالظبط، أنا كنت بشاور،
كان بيرد بربع سلام مع حطة ضحكة.

كنت بحبه.

حيرد أخيما اللي بيقرأ الحدوته، طب ليه؟.. فيه حد يحب الـ باني
بيته في تل زباله؟

راح أرد عليك :

مش عارف ليه أنا كنت بحبه، يمكن حسيت إني بشوف حدوته
بتخرج من جوه اللوحة، بتبص عليا، عايزاني أبص كويس في
الألوان.

ويمكن حسيته مش زي عيال الحواديت ف كتاب جدي المتشقلب،
يمكن علشان من غير أم، يمكن علشان مش بيروح المدرسة
ويانا، حسيته غلبان.

فارس عمره ما صاحب حد، فارس عمره ما خد ولا باع من حد،
كان زي العفاريت اللي بتسقي زرع الحواديت، كان عند الناس
ميفرقش كتير عن حطة في تل زباله.

لكن لما ببيجي أوان المولد، الناس تحترمه، بالذات النسوان،
ويقولوا :

- "فارس هو الحارس اللي بيحرس سيدنا الراجح".

ويقولوا كمان:

- "فارس بتحل عليه البركة".

أعرب حاجه إن الواد فارس عمره ما حضر المولد، ولا ركب المراجيح، ولا لعب البمب، ولا حتى زار صاحب المولد.

وف يوم قبل الفجر ما يدن بشوية، صحيت م النوم على صوت طلقات النباييت اللي بشوفها على اكتاف الغفرا، ووقفت على البلكونة أتفرج.

كنت أسمع إن الغفرا بيقتلوا في كلاب الشارع، بس دي كانت أول مره أفقشهم.

المنظر كان مش واضح خالص، العتمة بتخفي وشوش الغفرا، وكلاب السكة بتهرب ناحية أكوام التل، وصوت الضرب ما يببطلش.

وأسمع أصوات الناس جوه بيوتها بتفتن على كلب أو اتنين وتقول:
- "يا غفير مختار.. فيه كلب بينبح في الجيهه القبليه جنب الدار".

شوية.. والناس كلها صحيت من نومها، والناس وقفت قدام عتبات دارها، والناس تفتن حبة وتضحك حبة، لحد ما مات الصوت اللي بينبح.

ستي فهيمة صوتها يمسح كل الألوان :

- "انت يا موكوس خش نام".

أمي كمان بتخاف منها ومن مشاكلها واسمع صوتها يقول :

- "خش يا واد لحسن تستهوى".

فارس سامع صوت النسوان الشريرة، جرجر نفسه بعيد وبعيد،

أبعد من حتنا، وأبعد من كل بلدنا.

من يومها وببيت فارس مهجور..

من يومها واللوحة يتيمة محتاجة لنور.

من يومها باقف فوق بلكونة دارنا ليلاتي بستنى عشان أتفرج بعد

أدان المغرب على عيل أكبر مني بشيرين، يمكن يرجع يخرج من

خط يفصل بين النور والضلمة من جوه التل !.

إِوعَى تَنَام ...

لِحَسَن تَحَلَم مِن غَيْر مَا تَحْسَن ..

وَالْحَلَمَ الَّذِي مَا يَبْصُرُ خَشَنَ فِ وَشَكَ بِشَجَاعَةٍ ..

مَمْلُوكٌ جَدًّا يَبْقَى هَلَاكًا .

الحدوة الثانية

مولد سيدنا بخوري، أكبر مولد في بلدنا، مراجيح ياما، عربيات
بمب المرصوص قدامها نباييت زي بتاعة غفرا النقطة، والمسؤول
عنها بنات من برة بلدنا مايصين بالفطرة.. وبيتقال مشيتهم بطالة،
وبيتقال بيروحو ليلاتي لقصر محمد بيه الراجح وليبت العمدة.
ستي فهيمة بتقول إن نعيمه فراشة الوحدة الصحية مصاحباهم.
وأمي ترد عليها :

"حرام، منحوضش ف أعراض الناس".

ستي بتضرب كف بكف وتصرخ وتقول :

"بتردي علياً يا شلبية، بتردي يا أم الموكوس المحتاس، والله اللي
يدور يلافيكي معاهم".

وأمي بترقع بالصوت الحياتي ف وسط الدار، وأنا بفرح أوي لما
الحرب ما بينهم تبدأ.

وبداية الحرب ما بينهم معناها إني اهرب ع المولد يجي ساعتين،
وأرجع بعديهم متسحب وسط النسوان اللي بيتلموا عشان يصلحوا
بين الاتنين.

وأول ما أخرج من دارنا أجري على عم فاروق.

عم فاروق كان من مصر، من حتة كان بيسمياها "السبتية"، بيلف
الدنيا من أول فوق ولآخر تحت، ويرجع من تاني في معاد المولد.
يرجع ساحب في إيديه اللعبة النصابة، لوحة كبيرة يعلق فيها
صناديق معمولة من الكرتون والصناديق مرصوفة بترتيب الأرقام
من واحد... لكتيبيير، قول مليون.

والصناديق مليانة جوايز، مش بالظبط جوايز، كانت بالنسبة لي
مليانة أحلام وظنون.

وف إيدو جراب جرابان مليون أرقام بأسامي الصناديق. وعم فاروق
بينادي في وسط المولد:

"حللي بقك... دور ع الصندوق المجنون".

وبيتم عليه كل عيال المولد.

عم فاروق كان دايمًا بيحيب وياه بنته، واستنوا الصدمة الجاية..
بنته اسمها إيه ???

حد يخمن؟

بنته اسمها "مصر"، طب والنعمة مسمى البت قال إيه مصر.

أول مرة قال قدامنا الاسم ضحكت وقلت لعشرين عيل كانوا واقفين
حواليه :

"بيهزر، تلاقية بيهزر".

ولاقيته مكشر، فضحكت وقلت :

"وماله يا عم فاروق، الاسم جميل والله، ده حتى جديد ومسكر".

اللي يزعل إن البت المقروضة كانت هبله، مبتعرفش تفك الخط ولا
حتى تساعد عم فاروق وتشغل وياه اللعبة.

اللي يزعل أكثر إن أنا حبيبتها، أصل مجرد إن الواحد يتعرف في
بلدنا على مصراوي يبقى اتفتحتله طاقة الأبهة والعظمة، يقعد
يتباهى في وسط الخلق ويحكي ويتحاكى عن شوارعها وعن
ميادينها وعربياتها وعن نسوانها - اللهم احفظنا - العريانة.

اللي يغيظك إنك لو دورت وراه حتلاقي صورة مصر في عقله
بيرسومها من حكايات الراديو اللي في دكانة نبوية الفتانة.

أول ناس أعرفهم من مصر كانت "مصر" وعم فاروق.

أول بنت لاقيتها بتضحكلي؛ طبعًا غير البت جرادة؛ كانت مصر.

أول حد أتعشى معاه حواديت مش حمضانة كان عم فاروق.

كنت بعيط لما بيحكي حكاوي عن الناس اللي بتتغرب وبتتسابق ويا
الموت لجل اللقمة، وعن الناس اللي بترجع تتقابل من تاني ويا
ماضيهم بعد الفرقة.

كنت بعيط لما بيمسح بإيديه الدمعة وينضف وشه بمسحوق
الضحكة الكدابة.

كان على طول بيزعق في السما ويقول:

"استرها يا رب.. ده احنا غلابة".

اللعبة بتاعة عم فاروق كانت غالية شوية، بقرشين، بس أنا رأيي
إن فلوس الدنيا تهون لجل اللحم النائم جوه الصندوق المجنون.
عم فاروق كان لما يشوفني يقدمني على كل عيال المولد، ويمد
إيديه بجرابه، ناحية إيدي. وأقعد أفصص في الأرقام وأحسس في
خطوطها من تحت لقدام.

كان كل عيال المولد بتقول العشرة هي اللي بتكسب، وبعد ما
أحسس وأفصص واختار ورقة وأقرأ عليها كل اللي حفظته من
القرآن تطلع إيدي بورقة، حاضناها وخافياها عن كل عيون
الواقفين.. يمكن خايقة من الحسرة ويمكن خايقة من العين.

وعم فاروق كالعادة يكرمش عينه ويضحك ويخلص بإيديه الاتنين
الورقة من حضن صوابعي الخافين. وأفضل باصص في عينيه
الساكتين يمكن ألمح فيهم عشرة، يمكن عينه تقوللي كسبت.

عم فاروق كالعادة بيفتح صندوق مش عشرة، ويهتف في الإيد
المهزومة: "حللي بقك".

- أرواح !؟

تاني يا عم فاروق، أدفع قرشين في اليوم وأخذ بيهم أرواح، نفسي
يا عم فاروق أكسب مره قبل أوان اللعب ما يخلص، نفسي أكبر
وأفأخر مرة في وسط عيالي إني لمست العشرة بإيدي، إني كسبت
فلوس.

كنت بحس بجد في لعبة عم فاروق إني زي ما بتقول ستي عليًا
"عيل موكوس".

عم فاروق كان دايمًا يضرب مصر، كان دايمًا يهربها من الضرب،
كانت صعبانه عليًا، وبتصعب أكثر لما تقول لأبوها :
"جعانه يا بابا".

فيرد عليها بشلوت يعصر نن عنيتها عصر.

كلمة بابا دي كانت في ودانا شبه الحاجة الجاية من مصر، شبه
العربيات اللوري، شبه الراديون، شبه التلافون اللي ف بيت العمدة،
شبه الناس الراجعة من عند رسول الله لابسين أبيض ف أبيض
وبردك بيقولوا شي الله يا بخوري.

بس أنا عمري، عمري ما حسدت البت إنها من مصر، وعمري ما
اتمنيت إني أنادي أبويا وأقوله يا بابا.

حسيتهم كده مش زيينا، حسيتهم زي كلوب الزينة، حستنا كمان
أحسن منهم، وأحسن من كل الناس اللي في مصر.

طب أنا عمري ما قلت لابويا أنا جعان، قبل ما افكر أنطق بيها
بيطل الخير اللي في دارنا يلجم بقي بنعمة ربي علينا ويفيض على
كل اللي يخطب على باب الدار ويقول أنا غلبان .

بس أما بفكر وأفكر، بقول مصر أكيد غلبانة، ذنبها إيه إن أبوها
مجوعها، ذنبها إيه انه ذالها ومبهدها في بلاد الله، لا نومة
مريحة، ولا هدمة نضيقة، ولا أم تريحتها .

البت كانت تهرب من صناديق أبوها، وتقعده ويايا شوية جنب
المرجيحة الشطاحة، كات بتعيط وتقول :

" أنا زي بنات الدنيا كان ليا أم، مش فاكرة الصورة اللي اترسمت
ليها من سنتين ويا الاسم في عقلي، بس أنا فاكراها .. كانت حلوة .
هربت منينا لما أبويا رماها بوابور الجاز في عنيتها، وشها
كرمش، ورموشها اتحرقت "

والبت تعاليط، وأنا أعاليط .

والبت تقوللي :

" إوعاك يامقامه تولع في عين حد، إوعاك تولد بت عشان تكرهها
وتجوعها وتعريها في وسط الخلق "

وأنا من جوايا برد عليها :

" كنتيش إنتي اللي ولعتي يا هبلية، وأنا ناقص، ستي فهيمة تبكيني
في الدار وانتي كلامك كره ونار "

حسيت إني راجلها، وقلت في ذات بالي:

"يا واد يا مقامه ما تتجوزها !

آآآه اتجوزها، دي مهمن كان من مصر، تملك هيبة في وسط
عيال الحتة".

وأرجع تاني وأفكر وأقول:

"ستي فهيمة حتضربني، وأبويا حيقول يا خي خدك لاوّل نص
ابتدائية".

طيب.. أهرب بيها؟

طب على فين، وأنا بردك أعرف أروح على مصر؟

ده أنا عمري ما بصيت أعلى من المادنة بتاعة الجامع، عمري ما
هربت بعيني أبعد من خضرة تحوط على أي شعاع خارج منها.
يا عيني يا "مصر"، مش حقدر أساعدك، وكمان م الآخر مش حقدر
أبعد عن أبوكي، لازم أكسب، لازم ولا بد ألمس بإيديا العشرة.

شيطاني لعب في دماغي وقاللي:

(يا عبييط، هو انت مصدق نصباية عم فاروق، حتلاقي جرابه فيه
كل الأرقام إلا العشرة، وكمان حتلاقي كل الصناديق مليانة "تحلية
البق"، بما فيهم صندوق العشرة).

رحت في يوم بالليل على "مصر"، سارق رغيفين قشطة من الحلة
اللي في أوضة ستي.

وقلت : "يا مصر اتعشي".

فرحت موت، وقالت لي: "حبك"،

قاتلها أنا نفسي أتفرج ع "العشرة"، نفسي أشوف الصندوق
المجنون إياه.

وقالتلي تعالى..

وسحبت إيدي لجوة الخيمة، وعطتني جراب الأرقام.

وقلبت الأرقام عالارض، ولاقيت قدامي العشرة، وفرحت.

- يا شيطاني يا ابن الكلب، بتلعب في دماغي؟، عايزني أكره عم
فاروق؟.

آه، نسيت،

قلت لمصر:

"باقي نشوف الصندوق المجنون، نتفرج ع الجائزة الحلم".

ولاقيتني قدام اللوحة المليانة صناديق كرتون، وفتحت الصندوق
العشرة.

وكانت الكارثة، وببص ورايا وقدامي وألقى شيطاني ببضحك.

ولعنت فاروق، وشتمت البت، وجريت على دارنا، ورميت عيني
في حضن أمي، وحلفتها، عمري ما حروح المولد، مش حخرج
من دارنا لحد ما يخلص.

كل ما بفتكر الجائزة اللي ف صندوق العشرة، أعيط.
عم فاروق كان كاتب جوة الصندوق بحروف بهتانة
كلمة "مصر".

إِوعَى تَنَام ...

لِحَسَن تَصْحَى تَلَاقِي بِلَدِكُوا فُعْمَى عَلَيْهَا
وَبَابِتَه فِي وَسْطِ الطَّل.
وَتَلَاقِي الْبَيْتِ اللَّي لَامَلَّوَا
فَهَاجِر فِي النَّاحِيَه التَّانِيَه مِنْ الدُّنْيَا.
النَّاحِيَه اللَّي صَفَار الرَّمْلِ بِنَاعَهَا
بِيَتَلَّحَلْ جِمَار الدَّم.

الحدوتة الثالثة

فاكرين؟....

لما ف يوم الشمس اتخاصمت ويا الدنيا، واتحايلت ع الضلمة تحل مكانها لحد ما تتعود ع الحيرة والتكشيرة اللي اترسمت في وشوش الخلق.

فاكرين؟....

لما الضلمة بتستغرب منيها وتهديها وتفكرها بحب الناس للنور وبتعطس فبتعمل حاجه شبه البرق.

والناس حيرانة ما بين النور والضلمة وتبص لفوق وتداري بايدها عنيتها لحسن يبجي النور على غفلة فيعميها ويخليها لا شايفة النور ولا عارفة الضلمة ولا قادرة تحدد فين الفرق.

فأكرين...؟

... أنا فأكر..

تقريباً يومها الضلّمة قالت للشمس:

"أنا مالي، خدي دورك في عيون الناس لحسن حد يقول إن الضلّمة
ممكّن تهزم نور الشمس".

يومها الناس ف بلدنا صحيت على صوت الراديو يقول:

"أنا كداب.. أولادكم ماتوا والأرض خدوها، والراجل اللي رسمتوا
ملامحه الصعيدية ف عين الشمس طالع بيقول: أنا ماشى، والحق
عليّ، وموافق إني استحمل أي عتاب".

وبنسمع صوت المادنة بتاعة الجامع بتقول قرآن عن سيرة الشهدا
وف نفس الثانية بنسمع صوت النسوان اللي الحزن ماليهم
بتصوّت من جوة بيوتها، والحزن ف صوتهم بينادي على عيالهم
اللي خدوهم لجل ما يكسروا بيهم شوكة البعدا.

وف مندرة الدار، ستي فهيمة واقفه قصاد صورة سيدنا الرئيس
بتعيط، بتقول له:

"ارجع يا جمال بلا لعب عيال، حتشمت فينا ولاد الكلب الكفار".

والبت جرادة بتطلع فوق السطح تبص يمين وشمال وبعيد يمكن
تلمح أي يهودى.. وتنزل وتقول:

"الراديو ده أكبر كداب يا جماعه، الأرض مكانها، محدش قرب
مئّيها، ولا حدش قرب م الدار".

والناس في بيوتها بتهرب من فكرة إن المادنة بتاعة الجامع
بتعزيهم، الناس مش عايزة تسمع قرآن.. القرآن يومها كان معناه
الحنن، معناه الموت؛ حتى لو كان يببشر بالجنة.
الناس مش عايزة تروح الغيط.

لأ، الناس مش فاكدة الغيط، أصوات ياما بتخرج من زرايبهم زي
عياط البني آدمين، واللي بيعرف يتفاهم ويّا طيورهم وحميرهم
وعجولهم، يعرف إن الصوت الطالع مئّهم معناه جعانيين.

وأنا واقف ف البلكونه ببص لفوق، مستغرب إن الشمس لحد
الضهرية مطلعتش، إن سحابة كبيرة بتمنع قرص النور عن كل
بلدنا.

والحاجة جليلة أم جلال تخرج من دارها تصوّت وتعيط وتخبط
على باب الدار وتقول :

" ست فهيم، كلمي عب ناصر من تلافون العمدة، وقوليلوا إوعاك
تمشي من غير ما ترجّع لعيال،

قوليلوا أم جلال بعنتلك لتنين وقوليلوا أساميهم مرزوق وجلال".
وستي فهيمة بتدفن راسها وراس الحاجة جليلة ف طرحتها السوداء
وبتقول وبصوت مبوح:

"بس يا بت بلاش خوتة، عيالك راجعين والأرض حترجع والشمس
حتطلع وجمال لازمن ولا بد حيرجع".

محمد بيه الراجح ييلف على بيوت الناس اللي عيالهم ع الجبهة،
ويقول للناس:

"الريس راجع، الريس حيرجع كل عيالكووا الأبطال".
والعمدة ف ديله يوزع ع العتبات فتة ولحمة وريالات عمال على
بطل.

والأيام في بيوت الناس تتلكع مش عايزة تعدي زي القطر بتاع
المركز ما بيسيق بالعافية حمارة الكارو العيانة.

وشوية، والشمس بتستهبل وبتنسى وتطلع من تاني وتاخذ غفوتها
لحد الضلمة ما تصحى.

وستي فهيمة قافلة عليها باب الأوضة تصلي وتقرأ القرآن وتبص
ف صورة سيدنا الريس، واللي يكلمها تقول له:
"سيبوني.. مهمومة وزعلانة".

والحاجة جليلة كشفت راسها ونامت على عتبة سيدنا الراجح
حالفة ما ترجع بيتها إلا اما يرجع ليها عيالها التايهين ف بلاد
الرملة العرقانة.

ويومين والناس بتحاول تهرب م الضلمة بغيوبة النوم.
تطلع أصوات من عند المادنة بتاعة الجامع بتقول:
"الواد مرزوق ابن الحاجة جليلة راجع بيعيط موجوع".

وانا بجري على البلكونة ألقى خلق الله اتلمت حواليه، تستغرب
من منظر عسكري لابس لبس العسكر مقطوع.
والواد مرزوق هو كمان بيعيط وبيسأل كل الناس عن أمه،
والنسون اللي عيالها من يوم الحرب مجاتش، تتشعبط في هدمه
يمكن ينطق ويقول:

"إبنك حي يا خالة، إبنك لسه مماتش".

والناس بتشاور للواد مرزوق على عتية سيدنا الراجح وبتمشي
وراه زي المشيين ف جنازة من غير خشبة ميت.
والحاجة جليلة بتلمح وش الواد مرزوق بيعيط، غطت راسها
ومسحت من جوة عنيتها الدمعة البايطة.
وبصوت شبه اللي بيخرج من بق الرجالة العيانة بتصرخ وتقول:
"فين أخوك؟"

والواد باصص في الأرض وساكت ودموعه بتروي الخرس النبات
ف وشوش الناس حواليه.
والحاجة جليلة بظهر إيديها المرعوشة بتضرب وشه وتمسح حبة
ميه بتخرج من جوه عنيه.
وبنفس الصوت الخارج من بير في الصحرا هربت منه المية
وحطت كل الرملة عليه، صرخت فيه:
"ارجع يا جبان مش عايزاك، ارجع لجمال وإوعاك أشوفك غير لما
تكون الرملة وجتة أخوك وياك".

والواد مرزوق يرجع من تاني باصص في الأرض وهريان من كل
النسوان اللي بتتشعبط ف هدمه المقطوعة، وتجهز صرخة لجل
ما تحضن بيها الموت يمكن ينطق كلمة:
" أيوه يا خالتي.. ابنك مات".

وأيام بتفوت وشهور بتموت ومحدث شاف مرزوق راجع حتى
يطل على أمه.
والحاجة جليلة من يومها قاعدة بفرشتها بتحرس عتية سيدنا
الراجح.

وف يوم بعد الست سنين ما تعدي وقبل الناس ما تنام، بنشوف
اتنين لابسين زي العسكر رايمين ناحية سيدنا الراجح، شايلين
المخلة بتاعة مرزوق وبيدقنوا كيس رمل ف حجر الحاجة جليلة
ويقولوا:

" ابنك مرزوق حملنا أمانة، وفاتلك ويانا...
حبة من رملة سينا".

إِوعَى تَنَام...

لِحَسَن تَنَسَى الْفَرْقَ مَا بَيْنَ الدِّينِ وَالدُّنْيَا

مَا بَيْنَ الْمَادِنَةِ بِتَاعَةِ الْجَامِعِ

وَالْقَصْرِ الَّذِي يَبْلَمَعُ فِي الضُّمِيِّ

الحدوة الرابعة

بيقولوا إن بلدنا ف يوم اتحرقت .
أكثر من نص القطن أسود وأكثر من نص القمح اتفحم .. أكثر من
كل الدنيا اتهد، وأكثر من كل الرجالة خافت تخرج من دورها .
بيقولوا كمان البوستة، النقطة، كتاب الشيخ مسعود، والوحدة
الصحية اتحرقوا .
إن العريه الكارو المسحوبة بحمار واللي بتنقل بستلات المية
عشان تطفى الولعة كمان اتحرقت بحمارها .
بيقولوا إن الدنيا ليلتها اتردمت بالدخنة السودا اللي بتزكم مناخير
الناس بريحتها... ريحة بكرة المتفحم والعمر المحروق .
بيقولوا مفيش دار في بلدنا ما طاليتهاش الولعة، والناس جواها
يصلوا ويدعوا وعينهم قبل إيديهم ممدودة لفوق .

بيقولوا ليلتها الناس قالت للموت جاهزين.. مش فارقة معانا،
واللي يموت محروق حيخش الجنة.
بيقولوا:

وفجأة ترعة سيدنا البهلول بقت أكبر من بحر كبير بيفيض بالمية،
والمية بتمشي برجلين لمكان الولعة تطفئها.
بركة سيدنا البهلول حلت يا اخوانا والولعة بتخلص والمية بتنشف
جوه الترعة.. السما رجعت صافية، والناس بتنفض كل تراب
الرعب ف جوفها ويتخرج للشارع بتخبط على باب النور الرياني،
والناس بتجمع بعضها تقعد حوالين الترعة المبروكة وتستغرب،
ده مفيش نقطة مية في قعر الترعة، ده مفيش غير لون الطوب
المتهب والخضرة المحروقة.

الناس حزنانة ومحتارة وباصة لفوق، يمكن ربنا يفرجها، يمكن
يلقوا بلدهم رجعت خضرا وينسوا الرعب وترجع تاني الضحكة.

شيخ الجامع بيزعق في الناس وينادي:

"المادنة بناعة الجامع متحرقتش، المادنة سليمة".

وسيدنا زباللي يزعق ويقول:

"الناس الصالحين مقاماتهم عايشة، وعايشة معاها البركة".

والناس بتبص الناحية التانية وتهتف وتقول:

"قصر البيه الراجح لساه منور، بركة سيدنا الراجح حالة عليه،
ومستجرتش الولعة تهوب نواحيه".

في الآخر...

شيخ الجامع ماشي بيحضن بعنيه المادنة العالية بتاعة الجامع.

وسيدنا زبالي بيجري ناحية سيدنا البلشي وبيقول:

"شي الله يا حبيبي".

والناس سحبت بعضها ومشىوا الناحية التاتية؛ قاصدين القبة

بتاعة البيه.

إِوعَى تَنَام...

لِحَسَن تَصِيحَى تَلَاقِي الدنْيَا مَشَى لِسَاهَا الدنْيَا

بِمَلَن تَلْقَاهَا بَتَجْرِي عَلَى سِرِيرِ الْإِنْعَاشِ..

مَسْتَنِيَهَ اطْوَت

الحدوتة الخامسة

عم زباللي حارس سيدي البلشي - واللي الناس كان بتحب تنادي عليه وتقول له يا سيدنا زباللي - كان بيصلي معانا الجمعة...
لأ مش عادى...

أول مره أشوف سيدنا زباللي يصلي ويّا الناس في الجامع.
راح أسمع واحد يسألني عن المانع... والرد بسيط.. منقول من خاشم ستي فهيمة:

"سيدنا زباللي بيصلى كل الأوقات مع سيدنا البلشي".
والشيخ محجوب شيخ الجامع أول ما بيلمح سيدنا زباللي قاعد وسط الناس راح حالف بمقام سيدنا البلشي ليخطب فينا الجمعة.
وعم زباللي بتزغرد ف عنيه الفرحة، أول مرة حيطلع ع "المنبر"،
أول مره حيعمل فيها إمام.

حاكم الناس في بلدنا قليلة الذوق مع كل الدنيا إلا مع اثنين.. اللي بيطلع ع "المنبر" واللي بيمسك ف إيديه نبوت النقطة، لازم ولا بد في الرايحة وفي الجاية تعظمه سلام.

وزباللي كان عارف جدًا إن الناس مش شايفاه زي شيوخ الجامع، الناس كات حاسباه درويش من دراويش البلشي، وساعات بيقلوا عليهم خُدام.

بس من الجمعة دي الدنيا حتتغير، سيدنا زباللي حيخطب في الناس الجمعة من فوق المنبر.

سيدنا زباللي بيطلع عتبات المنبر بالراالحه، ويبص على الناس من فوق وعنيه بتعيط ويقول: "سيدي البلشي امبارح قاللي: قول للناس قيامتكم حثقوم يوم الجمعة!".

وزباللي سكت مخطبش الجمعة، وبينزل من ع المنبر بيعيط أكثر. الناس بتبص شوية لبعضيها، وشوية تبص لشيخ الجامع مش عايزة تصدق نفسها.

الناس بتبخلق في الشيخ مرعوبة، مستنية يقول:

"ده كلام مجنون".

مستنية يقوم يخطب خطبة جديدة، أو يضحك حبة نفس الضحكة اللي بيضحكها لما بيتريق على ناس بتشكك فيه لما يلم فلوس للجامع، أو لما يشوف واحد متخايق ويا جماعته وجاي بمخدة ينام جنب المنبر، وأما ينادي عليه يعمل رايح في النوم مش سامع.

شيخ الجامع هو كمان كان بيعيط ومبلم، مش عايز يتكلم... وأما نطق قال للناس قولوا ورايا: "سلم سلم.. يارب سلم".
والناس مش عايزة تكرر ويا الشيخ.. الناس جريت بعنيها تدور على سيدنا زبالي ومش لاقياه.. الناس بتسيب الجامع وبتجري ناحية سيدنا البلشي، بتدور على سيدنا زبالي ومش لاقياه.. بتكلم سيدنا زبالي ومش لاقية اللي يرد عليها.

النسوان خرجت في الشارع بتعيط، وطبور السطح بتخرج وياهم بتقاضي، وحمير الناس وعجولهم ومعيزهم بتكسر في بيبان زرايهم وبتخرج في الشارع وياهم تراحهم في وليمة الرعب النازلة عليهم من فوق.

وساعات والناس في بلاد الله الـ"حوالينا" بتعرف بالخبر الداير في بلدنا، والناس الغرب بتفرش في الأرض وتقع وتنام حوالين مقامات الصالحين.

أول مرة بلدنا ألقياها أرحم من سوق يوم الأربع، ومحدث عاد بيروح الأرض، ولا حدش عاد يتخاق أو حتى يهزر مع حد.
الناس بتصلي، الناس بتخلص جزأين قرآن في الساعة الواحدة.
ومحمد بيه الراجح ساب القصر وراح على مصر، والعمدة لابس جلابية قديمة وفارش عمة راسه فوق الأرض وقاعد على باب الجامع بيوزع أكل على الناس، ويعيط.

والناس بتسيبه وتدخلم الناحية الثانية ويتقول له :

" أكلك وفلوسك حيودونا معاك النار".

الناس بتعيط أكثر ما تصلى، والواحد منهم ماشي يكلم في اللي يقابله، أيًا كان اللي يقابله، ويقول له : " سامحني"، ويرد أخينا عليه ويقول له : "... وانت كمان".

والناس الكبرات في بلدنا بتزعق ع " الشيخ محجوب" علشان ينزل من فوق المادنة بتاعة الجامع.

حاكم الشيخ محجوب هو اللي معاه مفتاح الباب اللي يوديك عالسلم اللي يخليك تطلع فوق.. قرب السما بشوية.

والشيخ محجوب نازل زي الناس بيعيط، وتقول له الكبرات :

" يا شيخ محجوب... قولتلنا زمان الدنيا مش حتقوم قيامتها من غير علامات".

والشيخ محجوب بيزعق فيهم ويقول : " روحوا اقرولكم حبة قرآن أو صلوا وكفايه كلام، العلامات مش لازم تيجي لحدينا، ربنا خالق في الدنيا بلاد أكثر بكتير من حوارينا".

أجدع حاجة إن الشيخ مسعود قفل الكُتَّاب، والناس بصت لقيت كل عيالها بتدفن تحت الأرض الأقلام وألواح التحفيظ وبتلعب في خرابة سيدنا الراجح.

وأما بتسأل عيل منيهم: " طب ليه؟" ... حيقولك:

"عشان نبقى نكمل حفظ القرآن في الجنة".

حاكم الشيخ محبوب بشر كل عيال الدنيا بدخول الجنة...
اللي يضحك إن الغفرا بتوع النقطة هما كمان عملوا زي عيال
الناس، حفروا لجل ما يدفنوا بناذقهم تحت خرابة سيدنا الراجح.

والأيام في عيون الناس على غير العادة بتجري، والناس في بلدنا
بتجري وراها عشان تلحقها، تخليها تهدي شوية، تقفش في النور
لجل تكروهوا في الليل وتخليه ما يقربلوش، تمسك بسنانها وبإيديها
في جلايب الليل لجل ما يتحنط في مكانه ويتخانق ويا النور ولا
يعرفهوش.

الناس بتصلي الفجر يوماتي وتطلع تقعد حوالين الجامع مستنية
الشمس تططب على خد الدنيا من الناحية اللي يوماتي بتطلع
منها... الناحية اللي بتحضنها عنهم لما يصلوا، خايفين الشمس
تكربج كل الدنيا على قفاها وتطلع م الجبهة اللي الناس في بلدنا
اتولدوا لقوا كل اللي يموت يسكن نواحيها.

ولاقينا يوماتي بلدنا بتتخانق ويا النور، ويوماتي بتتخانق ويا
الضلمة، ويوماتي بتتخانق ويا شيطانها اللي غواهم عمر بحاله
وخلاهم من غير تحويشة تططب كفة حسناتهم وتنجيها.

الدنيا بتنزف دم يوماتي لحد ما وصلت للنقطة اللي بتهتف بحياة
الموت وتطرطش بسواده ماضيها.

أهل بلدنا وأهل بلاد الدنيا الـ"حوالينا" واقفين حوالين الجامع
يستنوا الشيخ محبوب ينزل من فوق المادنة بتاعة الجامع لجل
يصلوا الفجر بتاع ليلة الجمعة الموعودة... آخر فجر يصلوه
وتشوفه الدنيا، آخر ركعة وآخر سجدة وآخر قرآن يقرؤه.
والناس اتفقت حيخلوا الشيخ محبوب يقرأ القرآن في الركعة
التانية ويدعي لحد قيامة الدنيا ما تطلع وتقوم.
والشيخ محبوب نازل من فوق من كتر المية اللي بتخرج من جوة
عيونه وتغرق دقنه وكل هدومه.. الناس قالت يمكن محموم.
والشيخ محبوب بيرص الناس جوة الجامع ويبيص ف ملامحهم
على قد ما يقدر... والناس هما كمان واقفين يتلفتوا حواليهم يمكن
واحد منيهم يلح آخر صورة خدتها عيون الدنيا لأبوه أو ابنه أو
أخوه، لجل يخزنها ف عينه..
وتلاقي الواحد منيهم بينط بودنه برة الجامع يمكن يلح بيها آخر
صوت للدمعة اللي بتصرخ على وش النسوان الـ"من دمه".
الناس حاسة وهي بترفع إيدها تكبر إنها بتشاور للدنيا تودعها،
وبعد ما ترفع إيدها ترجع تاني تنزلها وترجع ترفعها وترجع تاني
تنزلها.
الناس عارفة وفاهمة إن اللحظة اللي حتبدأ فيها تصلي حتبقى بداية
آخر نبتة دنيا حترويها دموعهم.
حتبقى اللحظة اللي وراها يا إمّا الجنة يا إمّا النار.

الناس خائفة...

ده الناس لما الدنيا تمطر في الشارع مع حبة رعد ويرق تلاقبهم خايفين يخرجوا من جوة الدار.

الناس افتكرت فجأة إن محدش نام ولا داق النوم من يوم الجمعة الفايئة.. الناس بتحسس نفسها بدوخة وتقع وتنام في مكانها. والشيخ محجوب بعد ما خلص سورة الفاتحة وبيأمن، مبيسمعش الناس بترد وراه، وكمان مبقاش سامع صوت التوبة الخارج من جوة دموعهم.

الشيخ محجوب ببص وراه بيلقي كل الناس في الجامع قفلت كل عيونها ونامت، والشيخ محجوب راح ماسح كل دموعه وقاعد عالارض ومن غير ما يحس ولا يقرر راح نايم. وبلدنا بقت زي قرافة كبيرة.

لحد الصبح ما راح طالع ع "الدنيا" زي الصبح بتاع امبارح. والشمس بتدخل على ناسها من الباب الرباتي العادي. والناس نايمة...

لأ...

مش عارف إن كانت نايمة وللا مش عايزة تقوم. يمكن كانوا خايفين من تفتيحة العين لتقابل حاجة غير الدنيا.

وشوية وكل عيال الدنيا راحت قايمة بتضحك .

وشوية وجريت تلعب زي عاداتها جنب خرابة سيدنا الراجح .

وشوية وجمّعوا نفسيهم لجل يصحوا الناس النايمة جوة الجامع
والنسوان النايمين حواليه، وبلدنا بتصحى قرب أدان الضهر وهي
بتضحك .

كل الناس في بلدنا قامت من رقدتها بتضحك وبتضرب كف بكف
بتسأل وبصوت عالي :

"فين سيدنا زباللي ابن الكلب الفركوك" .

كل الناس في بلدنا كانت فرحانة بتضحك، إلا عيالهم مناكيد .

جمعوا نفسيهم من تاني والواحد فيهم بيقول للتاني:

"يعني حنرجع من تاني نصحى يوماتي قرب أدان الفجر نروح
كتّاب الشيخ مسعود؟" .

والتاني يرد عليه ويقول:

"أنا قلمي ولوح التحفيظ حطتهم تحت الأرض وضاعوا" .

كل عيال الناس في بلدنا اتفقوا يقولوا:

"اقلامهم والواح التحفيظ بلعتها الأرض وضاعت.. يمكن راحت
سبقتهم ع الجنة" .

والناس في بلدنا بتتخانق في الرايحة وفي الجاية .

واحدة بتتخانق مع تاتية عشان الفرخة الذهبي .. والتاني بيتخانق
مع جاره وبيزعق ويقول: "والله ده حماري" .

وبلدنا شوية ولقيت نفسها في عركة كبيرة، ومحدث شاف تاني
الشيخ محجوب، ومحدث شاف من تاني سيدنا زباللي.
وشوية وصوت بيزعق في الناس ويقول:
" الغفرا بتوع النقطة لساهم نايمين حوالين المادنة بتاعة الجامع".
والناس بتروح نواحيهم ضاحكين لجل يصحوهم، والغفرا يفتحوا
في عنئهم فيلاقوا الدنيا لساهها الدنيا.
والغفرا تفرق من بين الناس ويتجري بتحفر في الأرض.
الغفرا بتخرج من تحت الأرض بنادق شبه النبايت، وبيطلع ويا
الردم بتاع الحفر أقلام وألواح تحفيظ...
من يومها وكل عيال الناس في بلدنا بتكره غفرا النقطة.

إِوعَى تَنَام ...

لِحَسَن تَصْحَى تَلَاقِي حَبِيبَكَ مَشَى جَنبَكَ

وَسَاعَتَهَا حَتَّعَرَفَ إِنْ أَطَوَّعَ بَيْنَقِي

الحدوة السادسة

في بلدنا اتنين مجانيين .

- آسف، واحد مجنون والثاني عبيط -

المجنون كان اسمه "زغابي".

الناس بتقول إن زغابي ده مش اسمه، الواد حط علينا وهو صغير

من حته اسمها "كوم السكر".

كوم السكر كانت زغابية، وبلدنا كانت أكثر من نصها هلالية،

تقريباً لقيوا الواد مجنون فانتهزوا الفرصة وشتموا زعيم السيرة

الزغابية وسموا المجنون بـ "زغابي".

القصد...

في يوم الصبح، المادنة بتاعة الجامع كانت بتصحي الناس علشان
الفجر، وزغابي داير في الشارع بيخبط ع الابواب ويزعق وينادي:
" اصحوا يا مجانين، النوم فات ..

اصحوا يا مجانين، الرئيس مات "

وستي فهيمة تبص من البلكونة وتزعق فيه وتقول:

" ريس مين يا بن المجنونة؟ "

وزغابي يرد عليها:

" الرئيس مات يا فهيمة "

زغابي أول واحد أشوفه ينادي عليها فهيمة كده من غير كلمة
ست .

ستي فهيمة بتعيط وتصحي الدار، وتبص في عيني أنا بالذات
وتقوللي:

" زغابي بيقول الرئيس مات "

وأفرك في عماصي وأرد عليها:

" ريس مين ع الصبح، زغابي ده مجنون "

والبت جرادة قال خايقة علياً وبتزعق فيا:

" اسكت يا مقامه لياذيك على طول، ده بيخدم سيدنا البنهاوي،
والود ما بينهم دائماً موصول "

وستي فهيمة بتبكي، لساها بتبكي، والبت جرادة تعيط هي كمان
وتقول: " كان راجل طيب، كان غلبان "

وانا برفع بُلغة جدي وبحدفها في راسها وبشخط فيها في نفس اللحظة: "وده مين ده يا جربان يا بنت الجربان؟".

وجرادة تولول أكثر وتقول:

"ودي عايزة نصاحه، الرئيس صبحي بتاع الفول".

والريس صبحي يا حضرات أصلاً ميت من أكثر من سنتين.. يمكن من قبل ما يردموا ترعة سيدي البهلول.

وستي فهيمه بدأت تتكلم ويّا الأسياد.

مقدرتش أمسك نفسي من نوبة ضحك بتلبسني في المعتاد لما البت

جرادة وستي فهيمه بينصبوا معزى جوة الدار من غير أسباب،

وييدهنوا كل حيطانها سواد، وأي حمار من أهل الدار مطلوب منه

غصين عنه يقلبها حداد... مرة عشان سيدي البلشي زار ستي

فهيمه ف فرشتها وكان زعلان.. أوعلشان المعزة البني اللي

عنيها بتشبه عين ستي مش عايزة تعشر وبتتنطط زي اللي

ماسسها الجان.. ومرة عشان تاهمين أمي إنها عاملة حجاب للبت

جرادة بوقف الحال.. أو علشان البيه الراجح عيان.. أو محمود

بن الحاج علي العطار مسكوه في النقطة وحاسس إنه بيتهان.

ومفيش مرة حسيتهم زعلوا على واحد مات.

بس المرة دي... بتعدي ساعات، وينسمع نسوان في الشارع

بتصوت، وشوية بيجروا ويقولوا وبصوت بيعيط: "الريس مات،

الريس مات".

والراديون اللي بيقرأ القرآن م الصبح ببطل لجل ما نسمع فيه صوت بيقول "الريس مات".

من إمتى يا خلق زغابي بيطلع في الراديون؟!.

ومحدث جري ع البلكونة، ومحدث حرك عينه من مكنها، كلنا بنبص لحاجة مش شايفينها، كلنا بنحاول نقتع نفسينا زي البت جرادة إن الريس صبحي مامتش، وإن الناس في الشارع تقصده هو، وإن زغابي احتل الراديو ببركة سيدنا البنهاوي وقاعد فيه من جوة.

كلنا خايفين الدمعة من عينا تفر لحسن بعيننا نشوفها فنصدق إننا عشنا لحد اليوم اللي يبكيننا الحزن عليه.

ستي فهيمة مبتعيطش، أمي بتدفن كل دموعها ف عين أبويا، وأنا زي الشارب بوظة وسكران، خايف ليفوق فيلاقي زغابي مطلعوا لسانه وشالح جلابيته وبيقول له:

"أنا مش مجنون.. الريس مات".

والبت جرادة بتضرب صدرها بإيديها وعماله تقول :

"هو الريس يا اولاد بيموت؟!".

ونفوق على هبة ستي فهيمة بتلبس جلابيتها السوداء، وبتلفح طرحتها عليها، وبتخرج حافية تلف عليهم واحد واحد.

بدأت بالبلشي وبو طاقة والبنهاوي وبخوري، وختمت بالمادنة بتاعة الجامع.

الناس في بلدنا طول عمرها مقسومة نصين: نص زغابي، وأكثر من النص هلالى.

المرّة دي بلدنا اتقسمت نصين...

نص بيمشي ويا زغابي، والنص التاني بيجري ورا ستي فهيمة. ستي فهيمة لمت حواليتها كل الجلايب السوداء، ولفت وياهم على مقامات كل الصالحين.. طلعت فوق المادنة العاليه بتاعة الجامع، وقففت فوق المنبر، مسكت في السماعة وبعزم ما فيها بتدعي:

"يارب.. طب خد كرمانى وسيبه يارب".

وسيدي كرمانى بيسمعها، يلطم على خده ويتنطط ويزعق:

"منك الله يا فهيمة، جرسيتني في وسط الخلق".

وزغابي لامم حواليه رجالة كتير ببشيلوا نعش كبير باين من جواه صورة ف جسم الرئيس.

والجلايب السوداء رجعت لبيوتها تعيط وتصلي، والرجالة فرشوا الحصر على العتبات، الواحد يهمس في ودان التاني بحسرة عمره: "عبد الناصر مات".

والبت جرادة ف دارنا عمالة تولول وتقول:

"والله الراجل كان زي البفته البيضاء، محبوب م الناس وكويس".

وأنا قبل ما امسي لسانها ببلغة جدي، قلت أسألها سؤال:

"تفتكري... مين يا جرادة ممكن يجيبوه يعمل ريس؟".

سكتت حبة... وقال إيه بتفكر، وتقول:

"عبّاسط، الشيخ عبّاسط طبعاً، وده برضه سؤال، هما يلاقوا زيه."

من يومها بعلم في جرادة سياسة ووطنية..

ويوماتي بعد ما تتوسطن مندرة الدار في الفجرية تزعق وتقول:

"تحيا الجمهورية العربية".

إوعى تنام ...

لحسن نصحى تلاقى اطون بيطلع في لسانه

ويقولك ..

اعرفني , بس اوعاك تحليني

الحدوة السابعة

طول عمري وأنا عايش وسط الناس اللي في بيتنا بشوف الموت
من حنة بعيدة.

يمكن من بلكونة دارنا وانا بسمع صوت النسوان لما تصوتت ورا
نعش الميت... وساعات من سيرة الصالحين اللي لباثة في بق
البت جرادة وستي فهيمة... ويمكن من كتب الحواديت فوق سطح
الدار قبل الديك الرومي والمعزة البني ما يهرسوا كل الناس اللي
بتتكلم وتعيش وتموت جواها.

طول عمري بخاف م الموت، بالذات لما أمني بتتفرز وبتتعصب
على كل الدنيا وتدعي تقول:
"خدني يارب وريحني".

وببص ف نفس الثانية لفقو؁ عئء اللنضة المعلقة في السقف؁
وبصوت آارج من نن عنيا بقول :

"لأ؁ ومقام سيدنا البلشي يارب ما يبجي اليوم وتريحها".

طول عمري بشوف إن الموت ءءوة.. يحكوها لما العيل يغلط
ويهزر ويا الدنيا ويفضحها.
لءء في يوم..

المعزة اللي عنيا بتشبه عين ستي فهيمة سهّتنا وعملتها وماتت.
ماتت من غير ما تخلف عيلة تفكر كل الناس بالعين اللي بترعب
أءءع شنبات في بلدنا.

البء جرءاءة هي اللي اءكشفت موت المعزة؁ نزلت من فوق السطح
تعيط؁ وبصوت واطي تميل على سيءي كرمانى تقول له :
" السء فهيمة المعزه تعيش إنءا يا سيءي".

وسىءى كرمانى ببقل بقها باىءيه لءنين ويقرر إن مءءش لازم
يعرف بالكارئة لءء ما يتصرف. وأما لمءنى قريء منهم ءاطط
وشي ف ءلة مءشى وبستهيل؁ إءأكد إنى سمعت كلامهم راء قائل:
" إوعاك يا مقامه تقول لامك أو أبوك أو ءتى السء فهيمة لءسن
ءءصل مءزنة في الءار ومءءش ناقص"

وانا زي العاءة بهز في راسى؁ قال يعنى موافق؁ وبقول له :
" ءلاص.. ولا ءء ءيعرف ءلاص".

وبنسمع زفة مولد سيدنا بخوري بتلف الشارع، والزفة زمان كانت
بتضحكني، بتخليني أفضس على روعي من كتر الضحك.
كنت بشوف ناس عمالة بترقص وتطبل راكبين حناطير وخيول
وحمير وجمال، وتزعق وتقرب من عتبات الناس وتقول :
" الفاتحة للحاج فلان، الفاتحة للست فلانة ربنا يرحمها".
واصحاب العتبة بيفرحوا موت وبيبعثوا للناس اللي بترقص وتقول
أسماء أمواتهم شلنات وبراييز.

كنت أضحك لما ألمحهم جايبين عيل من سني ولايس أبيض ف
أبيض، فوق راسه عمة طويلة خضرا وشال، ويقولوا ده بركة وم
السلسال، وتبص ف وش الواد تلاقيه قرفان مرعوب بيزعق
ويقول: "مش عايز".

واما كبرت شوية كنت بخاف م الزفة بتاعة المولد، كنت بخاف من
أعلام في إيدين الناس مرسوم فيها حروف ونقوش مش مفهومة،
ولا زي اللي اترسمت في الكرايس.
كنت بخاف من لبس غريب بيفكرني بصورة العفاريت والجن اللي
بترسمها الحواديت بالليل تحت لحافي.

..القصـد..

قلت لسيدي كرماني وانا بضحك : " هات قرشين أنزل ع الزفة
واخليهم يقرأوا الفاتحة لستي فهيمة المعزة".

وقبل ما تمتد إيديه على وشي؛ بيكتفها الصوت الطالع من أوضة
ستي فهيمة يقول:

"خد يا مقامه... تعالى عايزاك".

وبجري عليها أهدد سيدي وأقول له:

"هات القرشين لحسن والنعمة أقول"..

وبخدمه منه وبدخل على ستي فهيمة ألقياها مادّة إيديها بربع
جنيه صحيح، وتقول لي:

"روح للشيخ درديري خادم سيدنا بخوري، اديله الربع جنيه وقول
له : اقرأ الفاتحة لستي فهيمة"..

يا خرابي، ربع جنيه بحاله، هو حيقرا المصحف كله؟!..
وأنا مالي..

وجريت على حسني بتاع التموين، خليته يفك الربع جنيه شلنات..
ورجعت أشاور للزفة...

يلمحني الشيخ درديري ويمد إديه ويسألني:

"إيه يا مقامه.. عايز ندعي نقول إيه؟!.."

ويرد عليه وأنا مادد إيدي بشلنين:

"ستي فهيمة قالتلي أقولك، اقرالها الفاتحة... مش مرة... اتنين".

وبيستغرب ويقول:

"وده برضه كلام يا مقامه؟ بتقول على ستك ليه، ربنا يا بني يديها
الصحه وطولة العمر".

ويرد عليه:

"عندك حق يا شيخ والله..."

وبرجع إيدي في جيبي من غير ما اديلو فلوس، والشيوخ درديري
بيقفش فيها زي العفريت في الحدوتة ما يقفش في الدنيا لما بيخرج
من جوة فانوس.

ويرد علياً وهو بيضحك بالكذب وضارب بوز:

"لأ يا مقامه يا ابني ما هي برضه الفاتحة ع الحي تجوز".

وبيرفع صوته ناحية عتبة دارنا ويدعي:

"الفاتحة لست الستات، الست فهيمة، ربنا يديها الصحة وطولة
العمر".

وف نفس الثانية بيطلع صوت من جوة الدار، البت جرادة بترقع
بالصوت الحياني، والناس بتسيب الزفة، وعلى عتبة بيتنا بتتلم.
معرفةش أخش الدار م الزحمة، لفيت...، نطيت من شباك الدار
الوراني، ولاقيت الناس على عتبة أوضة ستي فهيمة بتتشحتف
وتعيط وتصوت.

والبت جرادة وأبويها وجدي واقفين على راسها يبقروا القرآن،
جدي بيلمحني في وسط النسوان وينادي علياً:

"تعالى يا مقامه سلم على ستك قبل ما تتغسل وتسيينا".

ولاقيتها مغطية دماغها ومش شايفاني.

قلت له: "خليها تشوفني يا سيدي".

ورد وقال:

"شايفاك .. كلمها، قل لها في الجنة يا ستي إن شاء الله".
مش عارف ليه معرفتش أعيط... كان متهياي إن أكيد فيه حل،
إن أبويا حيضك بعد شوية ويحضن فيا يقول:

"كنا بنضحك وياك يا عبيط".

أو أمي حترجع م السوق بعد شوية وتزعق فيا:

"يا حمار ستك نايمه... شوية وحتقوم".

كان متهياي إني حغمض عيني وأفتحها ألاقي الزحمة وكل عياط
النسوان علشان المعزة..

عمري ما شفت بعيني جتة بني آدم ميت، على طول كنت بشوف
الموت في الصوت الطالع من بق النسوان.

المره دي، فتحت عنيا وركزت شوية لاقيت بيني وبين فرشة ستي
سور كله قزاز ف قزاز..

لأ.. م الجنب بتاعي قزاز مرشوش بالميه، والجنب التاني قزاز
مش شاييف غير حبة ضلمة.

مسحت بإيدي عنيا لاقيتني بعيط.. ولمحت ف وسط الزحمة الشيخ
درديري بتاع الزفة رافع ف إيديه جنب عنيه وبيدعي، رحت
مفضي جيوبي وناولته بقية الربع جنيه وقرشين سيدي وقلت:

"ومقام سيدنا بخوري يا شيخ، اقرا الفاتحة لستي فهيمه".

والشيخ درديري بيرفض ياخذ مني فلوس.. رجّع إبدي وقال لي:
"إمسك مصحف واقعد على راسها، اقرا القرآن وادعيها".
ومسكت ف جلابية سيدي، مش عارف كنت ساعتها بيعط ولا
بصوت ولا مبلم، وقلت لـ سيدي:
"عايز أشوفها، وغلاوة ستي نعيمة المايصة يا سيدي لشوفها".
وقبل ما اخلص اسم نعيمة؛ كان سيدي بيكتم بقي بايد والايدي الثانية
تشيل الغطا من على ستي.
ولاقيتها عندها مقفولة، مش نفس القفلة بتاعة النوم العادي، فيه
حاجة كبيرة بتخرج من بين شفائيفها بتكلم مع لنضة سقف
الأوضة.. فيه حاجة مكتفة دراعاتها وبتزغزغ شفائيفها.. فيه صوت
مكتوم خارج مع طيف الضحكة المرسومة في ملامحها.
الصوت لأول مرة ف عمر الدنيا يزعق فيا بصوت واطي يقول لي:
" احكينا".
ولأول مرة ف عمر الدنيا بيعط من كتر الحب.
وبنسمع فجأة صوت طازة لساه خارج من كرتونة الحزن المتجدد
والصوت كان ناظط من فوق السطح..
وبنجري نلاقي أمي رجعت م السوق، قاعدة تصرخ وتصوت وتعيط
قدام جتة ستي فهيمة المعزة!.

إوعى تنام ...

لحسن تصحى تلاقى إيدك مر عوشة من الخوف

ومراية وشك بتبصن عليك ..

بس بترسم وشن حمار

الحدوتة التامنة

بتقول الحدوتة ..

إن أسيدانا: الراجح والبنهاوي وبخوري والبلشي وأبو سريع،
اتجمعوا قبل الفجرية ف يوم وسط الجرن بتاع سيدنا الراجح.
والنور كان طالع من جوة حباب عنينهم عواميد توصل أرض بلدنا
بخيوط النور اللي بتخرج من جوة الدائرة البيضا المتعلقة في
السما من فوق.

الحدوتة بتقول:

يومها السما كانت مليانة بورد بيلمع وسحاب أبيض شفاف
وروايح. والهوا كان عامل زي النسمة الرايقه اللي تهف يوماتي
على وشوش الناس اللي ثقيل حبة قصاد ترعة سيدي البهلول.
والكروان بيصبح ع الناس والدنيا بتسبيحه الحلو الموصول.

والناس نائمة، والمادنة بتاعة الجامع بتأخر قرآن الفجر شوية.
وأسيادنا بيلفوا بنورهم على كل مكان ف بلدنا، ماشيين.. فوق
الأرض بشبرين... لحد ما وقفوا قصاد باب الشيخ صياح.

والشيخ صياح واحد من سلسال سيدنا الراجح، بيحفظ كل عيال
الدنيا القرآن، بيحجوز ويطلق كل الناس في بلدنا، بيقك المربوط
ليلة الدخلة، وعنيه على طول مقفوله زي الواحد لما يكون نعلان.
برضك كان الشيخ صياح فلاح.

أيوه صحيح.. لا حداه دار ملك ولا فدادين، بس مربى في داره
جاموسة ومعزة وركوبة وخروفين، ومأجر قيراطين طين.

والشيخ صياح أول ما الدقن ابيضت ومسك في إيديه عكاز، الناس
في الراححة وفي الجاية تبوس في إيديه طالبين البركة ومداد
الوصل بسيدنا الراجح.

الناس بتقول إن عنيه بتطلع نور أبيض م اللي بيخرج م اللنضة
بتاعة الجاز.

والناس برضك بتقول إن أسيادنا في الليلة إياها فاتوا عليه وصحوه
من نومته واتسامروا معاه، وبكف الخير والبركة ملّسوا على راس
ابنه محمد ودعوله بمدد القيمة وكتر الهيبة ف وسط الخلق.

والناس برضك بتقول إن أسيادنا الصالحين فاتوا للشيخ صياح
شوالين ذهب أحمر أحسن بكتير م الذهب الميري.

والحدوتة دي يا حضرات كل الناس في بلدنا بتحكيها مع كل انتخابات للمجلس وعيالهم أول ماتخش الكتاب تحفظها زي عيها. الحدوتة بتتكرر لجل ما يعرف كل الناس في بلدنا وفي بلاد الجبهة الـ حوالينا إن محمد بيه الراجح يرجع أصله لسيدنا الراجح، إن محمد بيه الراجح راجل مبروك، إن القصر بتاع البيه واصل بمقام الراجح، والمال المتستف مال طاهر، والعضوية كرامة، والهيبة وود الناس الواصلين لعلامات للرضا والنور.

والانتخابات لما معاها يقرب في بلدنا بتلاقي وشوش صحيت م الموت، ناس بتغيب من قدام الناس لسنين وبيرجعوا وقت الهوجة لجل ما يهتفوا بحياة البيه.

لكن المرة دي الناس سمعت أغرب حاجة ف دنيتهم، واحد مترشح قدام البيه...

والناس تستغرب وتقول:

"ده أكيد مجنون، لا يكنش زغابى عملها ورشح نفسه".

بس الناس ترجع تستغرب أكثر، المترشح قدام البيه راجل متعلم متنور، والناس بتحبه ويتحب أبوه وأمه وستو.

معقول يا ولاد سلسال الست فهيمة يطلع مجانيين؟! ومقامه أفندي زينة الزينة يضيع نفسه ويتمرد ع "السلسال" الطاهر؟!

والناس في بلدنا يا حضرات اتقسمت يبجي خمسين حطة .
شوية بيترحموا على ستي فهيمة العاقلة .
وشوية بيعتبا على روحها عشان ماتت من غير ما تربيني .
وشوية يمصمصوا شفايفهم ويقولوا :
" حرام ... والنبي كان زي البفتة البيضة " .
وشوية يلماو ف بعضهم جماعات لجل ما يفتعوا فيا أبطل شغل
جنان البندر .

وشوية يسبوني، وغيرهم يتريق ويقول :
" يستاهل، مش عامل فيها خوجة ومنتور " .

لكن أكثر حاجة الناس اتعاظت منيها اليافطة اللي لطعتها على
بلكونة دارنا، وأكيد مش حتعدي عليكم كلمة بلكونة كده بالساهل
من غير ما تحسوا بقيمة الكلمة .

القصد ...

الناس راحت لجناب البية تسترضيه لجل ما يقلبش عليهم، لجل أما
يفرق بين أهل بلدنا الطايعين وما بين الواد ابن فهيمة الـ " آل إيه "
منتور ف مدارس البندر .

آه... وعم الشيخ عب مقصود، أكبر راس في ولاد عب مقصود
عايب ع البية إنه سمح لولاد الهرمة يشوفوا البندر من أصله .

يا نهار يا ولاد، ده أنا كان قصدي أصحي الناس من نومها، كنت
أقصد أقول للناس: ربنا فوق يا بهائم مش تحت.
كنت أقصد أقول للبيه: يومك قرب يا جنباه...

واتشهدت... وقرت اللي حفظته في عمري من القرآن يجي
عشرين مرة، وحضنت ولادي، وبصيت لمراتي وللبت جرادة،
وقلت لهم سامحوني.

وفجاه أصوات الموت بتبطل، آه والنعمة، بتبطل خالص...
وأنا بستغرب، هو الموت بيغير رأيه؟

أنا ولا نوح ولا لوط ولا موسى عشان ربنا يخسف بيهم الأرض.
القصص...

بصيت من خرم صغير من ورَب البلكونة، لاقيت البيه بيأمرهم
بالضحكة الملطوعة ف وشه وبيقول للناس:

"سيبوا الرجل وعياله، أنا عمري ما حتسبب في أذية حد".
والهتيفة بتهتف، والنسوان متأثرة بقرار العفو وبتعيط، والناس
شايلاه فوق دماغتها ورايحين بيه ع القصر وبيقولوا:

"بالروح... بالدم... نفديك يا جنب البيه"

"بالروح... بالدم... جدك حاطك ف عنيه"

الناس في بلدنا لساهم مش فاهمين الحواديت.

إِوعَى تَنَام...

لِحَسَنِ تَصْحَى تَلَاقِي الْكِرْبَاجَ لَوْنَهُ اتَّغَيَّرَ

فَتَفَكَّرَ ثَانِيَةً إِنَّ الْكِرْبَاجَ مِبْعَاشٌ كِرْبَاجٌ

الحدوة التاسعة

معلومة مهمة جداً...

محمد بيه الراجح ببييع القصر، وفدادين الأرض.

معلومة أهم...

محمد بيه الراجح ناوي يهاجر لبلاد برة وحيسيب العضوية للعرض

معلومه تغم...

بييه تاني - بيقولوا اسمه محروس بيه - راح يشتري منه الطين
والقصر.

معلومه تشل...

محروس بيه راح يشتري منه العضوية ويصبح نايب عنينا بجمالة
القهر.

التفاصيل :

محمد بيه الراجح بيلف برجليه، آه والنعمة برجليه؛ على عتبات
دورنا، عتبة عتبة.

بيسلم على كل الناس... المبسوط فيهم والمحتاس.

والناس في الشارع بتيوس في إيديه وتعاتبه :

"حتسينا يا سعادة البيه".

والبيه يضحك ويرد عليهم:

"رايح لولادي في بلاد برة أموت وسطيمهم".

والناس بتعيط وتقول له:

"طب والراجح يا جناب البيه".

والبيه يضحك أكثر ويرد عليهم:

"بركاته معاكم حتحل عليكم، الله يخليكم ليّا ويخليه ليكم".

بيني وبينكم الناس في بلدنا كانت فرحانة.

بيني وبينكم قلت بلاها سلامي عليه، والله ما انا واقف على عتبة

دارنا، والله لا انا قافل بابي وبلكونتي وحالف على بنتي ومراتي

والبت جرادة؛ محدش حيخطي العتبة، ولا حد حيتفرج ع الزفة

الدائرة في كل مكان... وجرادة تعيط.

وجرادة زي ما حضراتكم عارفين غاليه عليّا، كفاية إنها من ريحة

ستي وأمي وأبويها وهديتهم ليّا.

قلت لها : " اخرجي يا جرادة اتباركي بسيدنا البيه ".
أصل الناس في بلدنا غلابة بيتباركوا بالمجانين وأصحاب العمه
وأصحاب المال؛ حتى لو كانوا من غير ذمة.

وتلف الأيام وبلدنا غريبة، زي المية الحلوة لما تسافر وقت
الفيضان للغربة في وسط المالح، بتحس بوحشة غريبة، بتحس
إنها محتاجة تموت لجل ما تتخلص من ذل الأسر المر.

بتلف الأيام وبلدنا مش لاقية كبير يتربع على عرش استعباد الخلق
الغلبانة، والناس ماشية في وسط الشارع حاسة انها ملكت دوار
العُمُوديه واستغنت عن كل جحور العبودية.

بتلف أيام وبلدنا بتهمس عن محروس حيحل محل الراجح، بيقولوا
الراجح باع له مقام جده وحتى خرابته الواسعة.

أيام والناس في بلدنا بتصحى تلاقي مقامه اتساوى بالأرض،
والسور العيان اتهد وأوناش ياما بتنزح كل زباله التل.
المنظر من بلكونة دارنا اتغير، المنظر بقى زي الفل.

شهور وشهور والمنظر بقى قصر كبير يحرم بلكونة دارنا تشوف
المادنة بتاعة الجامع.

فكرني المنظر بالموت.

وعرفت إن الموت مش بس ملامح ستي فهيمة وهي بتتخاقق ويا
الضلمة، ولا بس البت جرادة وهي بترقع بالصوت.

وعرفت إن الموت بيلون وشه بألوان الثُرقَة، والثُرقَة ألوانها كثيرة، أكثر من كل وشوش الفرحة لما بيتلاقى اتنين من بعد الغربية.

الناس اتشائمتم من هد مقام الجد، الناس كرهت سيرة الراجح، والنسوان بتقول : "لعنة ربنا حتكون الرد".

والبت جرادة لبست خلخال الحكمة وفتفت وسط الدار:
"دي علامة من علامات العار، والساكت حيروح النار".

الناس مستتية البيه محروس، الناس زهقت من تمثيل أدوار الكبراء.. الناس محتاجة من تاني تطاطى وتحني الروس.. الناس في بلدنا محتاجة لإيد تسعد أنفاسهم باليوس، ولرجل بتلبس لميع على أحلامهم تهرس وتدوس.

الناس صحيت من نومها في يوم جمعة لقيت زفة كبيرة بتذيع البشرى، البيه محروس حيلف برجليه على عتباتنا، عتبة عتبة، حيسلم على كل الناس؛ المبسوط فيهم والمحتاس.

بعد صلاة الجمعة بساعتين، الناس اترصت قدام العتبات، وعيونها بتستنى اللحظة اللي تهلل فيها بروية راجل مش عارفينه جاي منين... مش عارفين إذا كان له حدانا مقام يرعاه وتحل علينا البركة معاه، ولا البيه جاي لينا من مصر، جاي يهزر، يشتري قصر ويبني في قصر.

من تاني..

قلت بلاها سلامي عليه، والله ما انا واقف على عتبة دارنا، والله
لانا قافل بابي وبلكونتي وحالف على بنتي ومراتي محدش حيخطي
العتبة، ولا حد حيتفرج ع الزفة الدائرة في كل مكان.

وجرادة تعيط.. والمرة دي جرادة مش عايزة تشوف البيه، بتقول:
"ستي فهيمة الله يرحمها ويجعل مثواها الجنة كانت بتحب البيه
الراجح، كانت بتحب مقام بوطاقية، كانت بتحب تأدن ويا الصوت
الطالع م المادنة بتاعة الجامع في الفجرية".

م الآخر... البت جرادة كرهت محروس بيه من غير ما تشوفه
وبتتحسر على أيام الراجح؛ مع إنها عاتبة عليه إنه يفرط في مقام
جده ويهد كيان البركة اللي كنوز الدنيا بحالها مبتقدرش تتوله.

أصوات من برة الباب بتزعق وتنادي:

"يا مقامه أفندي... يا مقامه أفندي...."

محروس بيه عارفك... محروس بيه جايلك مخصوص "

والبت جرادة بتفرح ويتمسح دمعتهما وبتقول:

"ربك جابر يا مقامه، يقطع وبيوصل بميزان مدروس".

والهبلة بتجري ناحية صوت الباب الزاعق وبتفتح مع زغرودة

قوية تقطعها بقولها: "اتفضل سيدي البيه، اتفضل يا جنابه".

آه يا بنت الكلب يا قلابة، في ثانية الدمعة اتقلبت زغرودة؟.. في

ثانية نسيتي الراجح والبركة وستي فهيمة وكل بداية الحدوتة؟.

ووقفت أسلم ع البيه الزاير، واستغربت كثير إنه بيحضني وعارف
اسمي وبيعزمني في قصره الطاير.

وحاولت أزوغ منه وأتأسف له وأتجج بالضغظ الفاير.

ولاقيته بيرفع صوته في وسط الناس الماشيين وياه في الزفة
وييقول: "يا مقامه أفندي، هستناك، مش حقبل أعدار، عيبيب، ده
القصر يا راجل قدام الدار".

وبيمشي البيه ناحية قصره في وسط الناس، وأنا بلمح أغرب
حاجة في كل الموضوع... "البيه محروس، بيعرج ويزك برجليه".
والبت جرادة بتاخذ بالها وتغزل من تاني ف عناقيد الحكمة
وبتحضن وزة وبتقول:

"يا خرابي... مكسح، يا عين أمك يا سعادة البيه، صحيح يا ولاد
الدنيا ميزان متعلق في السما بخيوط، الدمع في كفة والضحكة في
كفة والبني آدم بينهم مربوط".

وحياة أمك يا حكيمة، وده وقته، دلوقتي تقولي أنا كنت بكلم ستي
فهيمة، دلوقتي تقولي روحها حلت في الوزه وكانت بترد عليكي.
إلهي تولعي وأخلص من قرفك وأفرح فيكي.

بعديها بيوم بصيت ولاقيت اتنين شبه البهوات جايبين ياخدوني
لمحروس بيه.. بيني وبينكم الفار في ثواني خد كاس العالم في
وداني وقاعد بيقرض فيها.. بيني وبينكم منطقتش ومشيت وياهم

خطوة وتانية ولاقيتني جوة القصر معاهم، ولاقيت البيه مستني
وصولي على باب القصر اللي يرد الروح.
أول ما لاقيته قدامي قلت: "يا بيه تعرفني منين؟"
رد علياً وقال:

"جرى إيه يا مقامه، مخك فين، ارجع بالعمر شوية، ارجع
عشرين... ثلاثين..

غفرا النقطة وبنادقهم، وكلاب الشارع تهرب منيهم ناحية كوم التل،
والناس الفتانة، والكلبة اللي اختارت عتية داركم علشان تتخانق
ويآ الفجر، ارجع يا مقامه لعيل كان بيمسي يوماتي عليك بالضحكة،
عيل شفته من فوق بلكونة داركوا هربان من غفرا النقطة الـ
"مالهم قلب"، هربان من نابيت عميانة بتساوي بينه وبين الكلب."

وقطعت كلامه وحضنت إيديه وصرخت في وشه:

"فارس.. الواد الشايل رجليه في إيديه."

رد علياً بسرعه وقال: "محروس... بيه."

وضحكت.. ودخلت معاه القصر.

معلومة أخيرة....

كل حيطان القصر متغطية بتصاوير حقيقية بالطول والعرض،
لكلاب جربانة بتجري وسط زبالة التل، م السقف لحد الأرض!.

إِوعَى تَنَام ...

لِحَسَن تَصْحَى تَلَاقِي لِسَانِكَ حَابِبِ صَوْتِ الضَّلَمَةِ

وَيَبِشْتَمُ نَوْرَ الشَّمْسِ فِي عِزِّ الحِلْمِ ..

يَمَلِكُن تَصْحَى تَلَاقِي لِسَانِكَ عَاجِزِ يَنْطَوِّعُ كَلِمَةَ (لَأُ)

الناس كانت بتخاف، الناس أصلاً كانت عايزة تخاف.
الخوف عندهم كان زي الطين الورث اللي يحافظوا عليه بالدم
حتى لو صابه العقم وتجريف الخير.
البيه النايب عمره ما كان بيزعل حد بنفسه وعمره ما كان حدًا
يزعل منيه عُفراً توزع على أحلام الناس الموت وتلبسهم عمم
النوم الطوالى.
بس العمدة كان بينفذ كل أوامره.
وعشان كده كنت تلاقى الناس؛ كل الناس؛ تكره سيرة العمدة
وتحب البيه النايب وبتدعيلوا، والأغرب إن الدنيا لما تضيق في
عيونهم طوالى بيجروا ناحية قصر البيه.
والبيه النايب راجل طيب، دايمًا يسمع شكوايهم، ودايمًا يلعن في
جدود العمدة قدام منيهم ويوعدهم إنه بنفسه حيثدخل.
بأمانة البيه كان دايمًا طيب.
مرة يطلع من حبس الغفرا راجل مسجون بالظلم.
ومرة يجوز بالعافيه الشيخ مخيون - شيخ الغفرا - لعيلة غلبانة
بتسرح ببخور في المولد، لما الناس في بلدنا هاجت واتلمت
حوالين البيه بتبوس في إيديه وتقول له: "إلا الأعراض يا جنابه".
ومره يرجع للواد محفوظ ابن نوارس النص قيراط الورث، الـ
كان "هربان منيه، ولاقوه متخفي في دُرّة أرض العمدة.

بس الناس كانت دايمًا تسأل نفسها: طب ليه البيه مبيطردهش
العمده وشيخ غفره، ليه مايخلصش الناس من ظلمه وشره.
البيه أغنى كثير م العمده، البيه واصل عند الكبرات اللي ف مصر
اللي الناس بتشوفهم في الراديو..

طب ليه مبيطردهش العمده؟ طب حتى الغفرا؟

لحد اليوم اللي الناس في بلدنا زهقت من كتر الـ"ليه...."
كل اللي اتهان وانداش بالصرمة اتجمع.. كل اللي اتهلب واتقيد
بالظلم.

أجيال طلعت للدنيا مقطومة بصرخة جوع أو ذل، ناس ليهم ناس
ماتوا من الحسره ومن لون الدم..

الكل اتجمع، الكل مقرر، الكل مسلح نفسه لحرب الشوم ومناجل
حش البرسيم.

حتى النسوان، والشيخ مسعود وزباللى وشيخ الجامع، ده حتى
زغابى مشلح جلابيته بيهتف في الثوار:

"طرايطر طرايطر... طرايطر يا ناس طرايطر."

واللمة بتاعة الناس كانت عاملة زي الزفة بتاعة المولد، مليانة
أعلام ودقوف وحمير وجمال ومناظر ناس دقنها متدروش من تقل
الحمل وطولة الصبر.

الزفة بتتجمع حوالين القصر بتاع البيه، رافعين الشيخ مسعود
فوق روسهم، والشيخ مسعود بينادي، وبينادي...

والبيه خارج يبطل عليهم من فوق كراماته، يبطل عليهم من
بلكونته بنفس الطيبة المعهودة.

وبأدب الدنيا، الشيخ مسعود رافع ايده لجل ما يسمح ليه البيه
بالكلمة... والشيخ مسعود ومعاه الناس طالبين الإذن من البيه
علشان ياخذوا بتارهم م العمدة.

والناس تهتف وتقول:

"يموت.. يموت... يموت".

والبيه طيب، يحافظ ع البسمة اللي في وشه وبيوافق بعد ما
بيفكر حبة وبيقول:

"يستاهل... راجل ظالم وضلالي ومجنون"

والبيه يستنى شوية ويسأل:

"مين راح يبقى عليكم عمدة؟"

والناس تتلفت حوايها.. واقفه بتسأل بعضها:

"أيوة صحيح، مين راح يصبح عمدة علينا؟"

الناس حيرانة وفي عيونها كلام للشيخ مسعود، والشيخ مسعود
رافض أي كلام في الموضوع وبيصرخ فيهم:

"محدث علمهالنا ف الأزهر يا اخوانا، وغلاوة سيدنا الراجح ما
أعرف تتكتب إزاي كلمة عمودية".

والناس من تاني بتتلفت حوايها.. بتدور على حد يوافق.

شيخ الجامع وزباللى بيتدارو في جلايب النسوان ... حتى زغابي
شلىح جلايبته وقلق وبيصرخ في الناس:
"جرى إيه يا طرايطير؟ ده انا مجنون ... مجنون".
والناس من تاني تلف عنيا لمقام بلكونة البيه، تستنى قراره
ومشورته.
والبيه لسا طيب بالضحكة المرسومة في وشه.. والبيه بيزعق
فيهم ويقول:
"طب إيه رأيكوا في الشيخ مخيون؟"

مش راح أكمل تفاصيل الحدوتة...
بس حنور حضراتكم بالخاتمة..
محدث في بلدنا قتل العمدة.
البيه النايب - الله يعمر بيته - طلع من جيبه أكثر من عشرة جنيه
لمراة الشيخ مسعود بعد ما مات برصاصه عبيطة كانت في طريقها
لكلب شوارع، بس الشيخ الله يرحمه، عمل دماغه بعقل الطلقة!.

إِوعَى تَنَام ...

لِحَسَن تَصْحَى تَلَاقِي الحِدْوَتَه طَوِيلَه ..

أَطْوَل بَلَّتِيرَ عَن عَمْرِك

سَاعَتَهَا اكَتَبَ تَوَكِيلَه ..

بَتَغُوضِن فِيهِ النَسِيَان .. إِنَّه يَفَكِّر بِبِكَ اَطْوَتَ

الخاتمة

كده برضه يا مصر ؟

كده برضه يا مصر، وهنت عليكي؟...

شكلك مش عارفاني، مش فاكراي، مش قادرة تبصي لجوفك لجل
أما تدوري على حبل الصرة اللي بيوصل عمري بمصاريني.

كده برضه يا مصر، ومش فاكراي؟...

مش فاكرة الواد التختوخ اللي أما اتعلم ضمة صباعينه اتعلم وياها
يخط الرسمة اللي بتملها حروفك.

الواد الكلبوظ أبو كرش اللي أما اتعلم يقرأ كتابه ويفتح كراسته
كان متخيل إنك شايفاه، إن الدنيا بحالها بتتغزل في جمالك وبتدفي
في حضنك وياه.

الواد أبو حسنة مدورة جنب عنيه، اللي أمه قالتله وهو صغير،
أصغر م القطه بحبة:

" الحسنة هي الميم.. وجراب النني بيرسم صاد.. والسحبة بتاعة
أرنبة الودن بتعمل ره أحسن بكتير م اللي بتكتبها الأبله في اسمك
ع الكشكول".

شاكلك لساكي بتفتكريني... أرجوكي افتكري..
أنا واحد م اللي اتربوا في حُضن الحُبّ اللي بحجم حلاوة بنوتة
بتخرج بعد أدان الفجر بتجري لجل ما تلحق ليها مكان في التختي
الأولانية.. حُبّ بطول البصة اللي مداها قصير من عيل شايف آخر
الدنيا جنب الإيد اللي بتضرب جرس الفسحة.
أنا واحد م اللي قالولهم في طابور الصبح يوماتي وبعد التكبير
نهتف بحياتك.
أرجوكي افتكري..

طب فاكرة أما طلعت الأول ونجحت في ساته، لما الناظر سلمني
الجائزة في وسط الحوش.. أبوة، القلمين فولوماستر والبراية
والقلم اللي الناس كانت فاكراه مستورد وبيتصنع في فرنسا، بس
أما كبرت عرفت إنه أصيل من حبرك ومأصل.
فاكرة؟...

يوميها الناظر قاللي؛ وكل بنات الدنيا بتسمع:
" شاطر، والله براوة عليك، عايزك تتشطر أكثر، تكبر أكثر، تنفع
بلدك أكثر وأكثر."
وساعتها أنا شفتك قدامي، مبتسمة، والنعمة أنا شفتك كنتي
بتضحكي في عنيا.

دققت في وشك لأول مرة في عمري اللي بيحبني، ولمحت عليه الأبله رباب ماسكة عصاية وبتشاور، على نور وخضار وصفار وعرق، على بركة دم بتخرج من جوفك، على مادنة جامع بتكبر وصيلب بيحبك وينور.

وف ايد الأبله رباب التانية لمحت كتاب مليون أسرار، مليون حواديت، مليون تفاصيل عن كل عيالك وعيال عيالك وعيال عيال عيالك، ولمحت وشوش أعرفها وشوش معرفهاش وشوش شفقتها متعلقه على حيطه دارنا.

طب عارفة...

لمحت الست عجينة بتاعة الطعمية، أيوه أنا عارف، اسمها أصلاً حسنية، بس عيال الحقة الشياطين بينادوا عليها يقولوا يا ست عجينة.

إيه؟! لأ والله، عمري ماشفتها زعلانة، دي بتفرح والنعمة، دي حتى اللي يقولها يا عجينة تطرطشه بالزيت اللي مولع وبتجري وراه وهي بتضحك وتقوم حدفاه بالقلاية...

أيوه لمحت الست عجينة، مرسومة بتفاصيلها ف صفحة كبيرة جوة كتاب الأبله رباب... شعرها لايبض منكوش مفلوق من نص دماغها، وعامل مجرى زي قناية عم إمام، وعنيها اللي الناس قالوا عنها ابيضت من حمو النار، والوش المليون تجاعيد وخطوط شبه اللي نشوفها جوة خرايط متعلقة على حيطه أوضة الناظر.

طب عارفة...

والنعمة لمحت بمناخيري ريحة الطعمية السخنة.

هاه، مش فاكراي؟... طب أقولك إيه؟

طب وغلاوة النيل مش فاكرة الواد اللي اتغزل فيكي بشعر كبيير؟

أكبر مني بميت سنه حب؟

آه... لما وقتت وقتته ف وسط الحوش وانا لامحك واقفة بعيد،

وعيال المدرسة بتسقف، والناظر بيهزر ويايا ويسألني: "وده

شعرك؟"

وبهز ف راسي بفرحة كبيرة وأقول له: "آه شعري".

سكت الناظر حبة، وبعديها الخزانة بتاعته بدأت تتكلم ويايا وترد

عليًا، والخزانه بتاعة الناظر طلعت رغبة.

أتاري الشعر اللي انا قلته مكتوب بالخط الحياني ومتعلق على

حيطة في ركن ف أوضة الناظر، وقالوا عليًا حرامي، وأنا بصرخ

فيهم طب ليه، ما الشاعر مات.

ولاقيتك واقفه فوقهم تبتميلي.. وسألتك: "هو أما الواحد يعشق

حد بشعر ويتمنى يكون خارج منيه يبقى حرامي؟".

فاكرة؟...

لاقيتك طبطبتني عليًا وملستيلي ف شعري الأكرت ومسحتني عياطي

وبوستيني.

ومن يومها وبتعلم شعر عشان أحبك زي كلام الشاعر ف الأوضة
بتاعة الناظر.

هاه... فاكراي؟

يا نهار يا ولاد... برضك مش فاكراي؟...

كده برضه يا مصر وهنت عليكي؟

بس إزاي مش فاكراة؟

أيوه صحيح ما لمحتش صورتى بتفاصيلها جوة كتاب الأبله رباب،
ولا حتى لاقيتك كاتباني هناك جنب الناس الـمالو هدمهم اللي
بنوكي وعلوا في سيرتك وحموكي.. بس أنا برضك واحد منيهم،
واحد م اللي بيبرسموا بالاحمر براويز حوالين الصورة، وأنا أصلاً
واحد من دمك، غصبن عني صاحي ونايم شارب من همك، غصبن
عن عمري قالولي: " انت وعمرك ليها".

فكتبت الصك بايدي اللي بقولك فيه إني ابنك، حقا، بتمنى أتمرغ
في ترابك، واتمنى أكون خط صغير في الصورة المرسومة لوشك.

طب فاكراة؟

قعدت سنين وسنين أدرس فيك، في تاريخك، في الأرض اللي
بتشرب من نيلك، والتانية اللي بتستنى الدنيا اللي بتشتني لجل
الأصفر يخضر ويرسم خط بطول الشوق لعنيكي.

قعدت سنين أدرس في البحر المالح والنيل الحلو، وف تحت الأرض وفوقها، وادرس في وشوش الناس من برة وف جتتهم من جوة، وف شرع الله اللي بيحكم جوة ضميرك بين الخير والشر.

واتعلمت الرسم...

فاكرة أما قالولي: ارسوم

فرسمت ف كراسة الرسم واحدة بتشبه ستي فهيمة فوق سجادة الصلاة رافعه إيديها وبتقول بعنيها: "يارب" ودموعها بتحفر ترعة كبيرة بتروي الجنب الثاني من الورقه بتاعة الكراسة.

والترعة بتحرسها الشجرة الخضرا، وبتحضن صياد وشه ببشبه عمي فاروق، وعيال عريانة نازلة تبلبط ع الجنين، ودائرة ملوئها بلاصفر برسما فوقهم واربطها بقعر الصفحة بعشرين تلاتين خط بيتخاصموا لجل اما يوزعوا في النور ع الدنيا من أول ستي فهيمة ف جنب الصفحة، ولحد الجنب الثاني اللي استهلبت وحطيت وسطيه الواد فارس لابس لبس العسكر، رافع بايديه نبوت شبه اللي بشوفهم ف ايدين الغفرا، وبيكبر بحروف مكتوبة وبينادى باسمك وحياتك.

ورسمت ف زفة مولد، ورسمت المعزة، ورسمت ف وش لبني آدم وكتبت فوقيه "عب ناصر"، ما انا أصلي ما شفتوش غير في لسان الناس.

فاكرة؟...؟

أول ما نهيت الرسمة ووقفت ورافع في الكراسية بإيدي لجل أما
تشوفني الأبله ربيعة، وقلت بملو الصوت: "أنا خلصت".
والأبله تبص على الرسمة وقرفانة وتزغرلي تقوللي: "إيه ده؟"
وبرد عليها ولسايا فرحان: "دي مصر يا أبله".
والأبله تمدني على رجلي وتضربني فوق ظهر صوابعي، وتشخط
فيا: "مصر؟.. لهو أمثالك حيشوفوا مصر منين؟.. ارسوم حوش
المدرسه يا حمار".

عيطت..

ولاقيتك واقفه قصادي، ملاك راسم على وشه الرسمة اللي الأبله
ربيعة رمتها من الشباك، ولاقيتك زي عايدك بتسميلي، واتخيلتك
شايلاتي وحضانتي، وبتقولي: "ولا يهكم".
هاه، فاكرة؟... إزاي مش فاكرة؟.

طب فاكرة أما قالولنا حتطلعوا رحلة لمصر؟، والمديرية حتبعت
للمدرسة توموبيل يبجي قد القطر، والتوموبيل حيوديكم ويجيبكم.
فاكرة أما كسرت الحصالة وعديت الشلنات الفضة وقلت لنفسى يا
واد يا مقامه هو يصح يا طحش تشوفك مصر لأول مره بلبسك
ده؟، طب حتى اشتري جزمة جديدة أو حتى كاوتش عشان
ماتوسخش البندر.

أول مرة ف عمري أنام جواكي، أول مرة أحس إن البيه الراجح
ملهوش لازمة، إني ف حضنك أحسن بكتير م الناظر ومن العمدة.
كل الناس نصحوني قبل ما اجيلك إني ما بصش ع النسوان
السارحين ليل ونهار ف شوارعك.

فى بلدنا الجدعان كانت بتقول: "نسوان مصر يودوا النار".

فكرة أما لاقيت الناس فى الجامعة بتهتف بحياتك وبتتخانق ويا
الغفرا بتوع البندر؟ بصيت ولاقيت واحدة من الزملا بتمسك إيدي
وبتقول لي: "ارفع راية واهتف ضد الظلم".

ومشيت وياهم ووراهم، وشوية لاقيت التلاميذ واقفين ف صفوف
بيصلوا صلاة الغائب على روحك، واستغربت كتير، بس وقفت
وصليت وياهم.

وشوية وزادوا العسكر، غفرا كتير لابسين أسود ف أسود،
وسوادهم مش زي سواد الحزن، شايلين نباييت أكبر بكتير من
نباييت غفرا النقطة.

يومها عاتبتك من غير ما أتكلم...

ليه بتخلى الحراس يلبسوا لسود؟، وليه تخليهم زي ما قالوا
يخافوا عليكي من التلاميذ؟، لهو حد يخاف من ولده الخارج من
جوة حشاه؟، حد يا خلق يخون ويموت روحه بروحه؟.

ساعتها دماغي خدنتي لصورة روح الكلبة اللي اختارت عتية دارنا
عشان تهرب من غدر النبابت الميري..
فاكراها؟ .. أكيد فاكراها.

ف لاقيتني بشيل ويّا التلاميذ الـ حواليا رايات مكتوبة بلون الذل،
ولاقيتني كمان بهتف وياهم، ولاقيتني بقول للعسكر وأنا بضرب
فيهم: " عمر ولادها ما كانوا كلاب، سيبوا العدل يدق الباب".
وزمايلي ولاد الكلب شالوني على اكتافهم، عملوني زعيم.
وخدوني العسكر..

طبعا فاكرة.. فاكرة الكرابيج السوداء وصرخة مصلوب على باب
الحيرة وألف سؤال بيدق في راسه وألف لسان بيعيط جواه وينادي
عليكي.

ولأول مرة أنادي عليكي ومترديش، ولأول مرة بيعط وما تمسحش
دموعي البسمة اللي ف وشك.

كده برضه يا مصر وهنت عليكي؟

شكلك لساكي بتفتكريني..

شكلك محتاجة أحكيك عنيا؛ عن بنوتة لاقيتها بتحضن رسمة
صورتك في عنيا؛ عن بنوتة قالتلي ف يوم:
" جرب مره تنام متعري وتستر أحلامك بعلمها وفكر فيها".

شكلك عايزاني أحكيك عنها كمان، عن فستانها الواسع الاخضر،
عن شعر بيداري في جوف الليل لجل أما ينور عين الحبيبة، عن
همس رموش بتضلل بصتها وطلتها ف وش الخلق.

شكلك محتاجة أحكيك عني أما دخلت الجيش ولبست الميري..

عني أما اتدهولت ف راسي وقلت أتجوز..

عن حلمي اللي ادارى ف وسط الزحمة لحد أما نسيت تجاعيده..

عن أكبر حدوتة ف جوفي اللي بتحكي عياط الليل على خد كلامي
المتذوق...

شكلك لساكي بتفتكريني !!!

وعارفك بتحبي الحواديت !!!

حستنى ثواني ف عمرك وارجع من تاني أحكيك حواديت..

يمكن... يمكن نتقابل مرة ف حضنك، واتأكد إنك لساكي هناك،
جنب الروح.

أرجوكي استني الحواديت.



لست قاصباً ولا روائياً ولا حنّاءً ولا شاعراً...

فقط أجسد تأملاتي في ثوب يُصطلح عليه

ويتقبله الآخرون

مراد فاخر

murad_3li@yahoo.com

n

١١	§ المقدمة
٢٥	§ الحدودة الأولى
٣٥	§ الحدودة الثانية
٤٧	§ الحدودة الثالثة
٥٥	§ الحدودة الرابعة
٦١	§ الحدودة الخامسة
٧٣	§ الحدودة السادسة
٨١	§ الحدودة السابعة
٩١	§ الحدودة الثامنة
٩٩	§ الحدودة التاسعة
١٠٩	§ الحدودة العاشرة
١١٧	§ الخاتمة



(+٢) ٠١٨٨٨٠٠٦٥ (+٢) ٠٢٢٧٢٧٠٠٠٤

www.shams-group.net